

新疆图志

新
華
書
局

新疆圖志卷九十一

奏議一 漢府

張騫請連烏孫議

公孫宏請屯田輪臺疏

班超請擊龜茲疏

陳湯謀擊郅支單于疏

甘延壽奏斬郅支單于疏

郭欽歸康居侍子

鮑昱請援關寵耿恭

杜欽論送罽賓使者

蕭望之諫結婚烏孫

張璠三策

陳忠請於敦煌置校尉疏

班勇請復置副校尉居敦煌長史屯樓蘭對

魏徵諫迎高昌王麴文泰入朝

魏徵諫披高昌地爲州縣

褚遂良諫置安西都護書

駱宏義討賀魯策

薛仁貴討賀魯疏

郭元振論吐蕃請罷四鎮兵披十姓地疏

郭元振諫發兵導吐蕃擊娑葛疏

狄仁傑諫發兵戍疏勒四鎮

韋湊諫募關中兵往安西討擊疏

李德裕諫應援安西北庭疏

張騫請連烏孫議

臣居匈奴中聞烏孫王號昆莫昆莫父難兜靡本與大月氏俱在祁連敦煌間小國也大月氏攻殺難兜靡奪其地人民亡走匈奴子昆莫新生傅父布就翎侯抱亡置草中爲求食還見狼乳之又

烏銜肉翔其旁以爲神遂持歸匈奴單于愛養之及壯以其父民衆與昆莫使將兵數有功時月氏已爲匈奴所破西擊塞王塞王南走遠徙月氏居其地昆莫旣健自請單于報父怨遂西攻破大月氏大月氏復西走徙大夏地昆莫略其衆因留居兵稍彊會單于死不肯復朝事匈奴匈奴遣兵擊之不勝益以爲神而遠之今單于新困於漢而昆莫地空蠻夷戀故地又貪漢物誠以此時厚賂烏孫招以東居故地漢遣公主爲夫人結昆弟其勢宜聽則是斷匈奴右臂也旣連烏孫自其西大夏之屬皆可招來而爲外臣公孫宏請屯田輪臺疏

故輪台以東捷枝渠犂皆故國地廣饒水草有溉田五千頃以上取溫和田美可益通溝渠種五穀與中國同時熟其旁國少錐刀貴黃金采繒可以易穀食宜給足不可乏臣愚以爲可遣屯田卒詣故輪台以東置校尉三人分護各舉圖地形通利溝渠務使以時益種五穀張掖酒泉遣騎假司馬爲斥候屬校尉事有便宜因

騎置以間田一歲有積穀募民壯健有累重敢徙者詣田所就蓄積爲本業益墾溉田稍築列亭連城而西以威西國輔烏孫爲便臣謹遣徵事臣昌分部行邊嚴勅太守都尉明燹火選士馬謹斥候蓄芟桑草願陛下遣使使西國以安其意臣昧死請

班超請擊龜茲疏

臣竊見先帝欲開西域故北擊匈奴西使外國鄯善于闐卽時向化今拘彌莎車疏勒月氏烏孫康居復願歸附欲共并力破滅龜茲平通漢道若得龜茲則西域未服者百分之一耳臣伏自惟念卒伍小吏實願復谷吉効命絕域庶幾張騫棄身曠野昔魏絳列國大夫尙能和輯諸戎况臣奉大漢之威而無鉛刀一割之用乎前世議者皆曰取三十六國號爲斷匈奴右臂今西域諸國自日之所入莫不向化大小欣欣貢奉不絕唯焉耆龜茲獨未服從臣前與官屬三十六人奉使絕域備遭艱厄自孤守疏勒於今五載胡夷情數臣頗識之問其城郭大小皆言倚漢與依天等以是效

之則葱嶺可通葱嶺通則龜茲可伐今宜拜龜茲侍子曰霸爲其國王以步騎數百送之與諸國連兵歲月之間龜茲可擒以夷狄攻夷狄計之善者也臣見莎車疏勒田地肥廣草木饒衍不比敦煌鄯善間也兵可不費中國而糧食自足且姑墨溫宿二王特爲龜茲所置既非其種更相厭苦其勢必有降反若二國來降則龜茲自破願下臣章參考行事誠有萬分死復何恨臣超區區特蒙神靈竊冀未便僵仆日見西域平定陛下舉萬年之觴薦勳祖廟布大喜於天下

陳湯謀擊郅支單于疏

夷狄畏服大種其天性也西域本屬匈奴今郅支單于威名遠聞侵陵烏孫大宛常爲康居畫計欲降服之如得此二國北擊伊列西取安息南排月氏山離烏弋數年之間城郭諸國危矣且其人剽悍好戰伐數取勝久畜之必爲西域患郅支單于雖所在絕遠蠻夷無金城強弩之守如發屯田吏士歐從烏孫衆兵直指其城

新刻國志
下彼亡則無所之守則不足自保千載之功可一朝而成也

甘延壽奏斬郅支單于疏

臣聞天下之大義當混爲一昔有唐虞今有疆漢匈奴呼韓邪單于已稱比藩唯郅支單于叛逆未伏其辜大夏之西以爲疆漢不能臣也郅支單于慘毒行於民大惡通於天臣延壽臣湯將義兵行天誅賴陛下神靈陰陽並應天氣晴明陷陣克敵斬郅支首及名王以下宜懸頭槁街蠻夷邸間以示萬里明犯疆漢者雖遠必誅

郭欽歸康居侍子

匈奴盛時非以兼有烏孫康居故也及其稱臣妾非以失二國也漢雖皆受其質子然三國內相輸遺交通如故亦相候司見便則發合不能相親信離不能相臣役以今言之結配烏孫竟未有益反爲中國生事然烏孫旣結在前今與匈奴俱稱臣義不可距而康居驕黠訖不肯拜使者都護吏至其國坐之烏孫諸使下王及

貴人先飲食已乃飲啗都護吏故爲無所省以夸旁國以此度之何故遣子入侍其欲買市爲好辭之詐也匈奴百蠻大國今事漢甚備聞康居不拜且使單于有自下之意宜歸其侍子絕勿復使以章漢家不通無禮之國敦煌酒泉小郡及南道八國給使者往來人馬驢橐駝食皆苦之空罷耗所過送迎驕黠絕遠之國非至計也

鮑昱請援關寵耿恭

今使人於危難之地急而棄之外則縱蠻夷之暴內則傷死難之臣誠令權時後無邊事可也匈奴如復犯塞爲寇陛下將何以使將又二部兵人裁各數十匈奴圍之歷旬不下是其寡弱盡力之效也可令敦煌酒泉太守各將精騎二千多其幡幟倍道兼行以赴其急匈奴疲極之兵必不敢當四十日間足還入塞

杜欽論送屬賓使者

前屬賓王陰未赴本漢所立後卒叛逆夫德莫大於有國子民罪

莫大於執殺使者所以不報恩不懼誅者自知絕遠兵不至也有求則卑辭無欲則嬌嫚終不可懷服凡中國所以爲通厚蠻夷愜快其求者恐壤比而爲寇也今縣度之扼非屬寶所能越也其鄉慕不足以安西域雖不附不能危城郭前親逆節惡暴西域故絕而不通今悔過來而無親屬貴人奉獻者皆行賈賤人欲通貨使買以獻爲名故煩使者送至縣度恐失實見欺凡遣使送客者欲爲防護寇害也起皮山南更不屬漢之國四五斥候士百餘人五分夜擊刁斗自守尙時爲所侵盜驢畜負糧須諸國稟食得以自贍國或貧少不能食或傑黠不肯給擁彊漢之節餒山谷之間乞匄無所得離一二旬則人畜棄捐曠野而不反又歷大頭痛小頭痛之山赤土身熱之阪令人身熱無色頭痛吐嘔驢畜盡然又有山池盤石阪道陜者尺六七寸長者徑三十里臨崢嶸不測之深行者騎步相持繩索相引二千餘里乃到縣度畜隊未半阬谷盡靡碎人墮勢不得相收視險阻危害不可勝言聖王分九州制五

服務盛內不求外今遣使者承至尊之命送蠻夷之賈勞吏士之衆涉危難之路罷弊所恃以事無用非久長計也使者業已受節可至皮山而還

蕭望之諫結婚烏孫

烏孫持兩端亡堅約其效可見前少主在烏孫四十餘年恩愛不親密邊境未以安此已事之驗也今少主以元貴靡不得立而還信無負於四夷此中國之大福也少主不上絲役將興其原起此張璠三策

北虜呼衍王常展轉蒲類秦海之間專制西域共爲寇鈔今以酒泉屬國吏士二千餘人集昆侖塞先擊呼衍王絕其根本因發鄯善兵五千人脅車師後部此上計也若不能出兵可置軍司馬將士五百人四郡供其犂牛穀食出據柳中此中計也如又不能則宜棄交河城收鄯善等悉使入塞此下計也

陳忠請於敦煌置校尉疏

臣聞八蠻之寇莫甚北虜漢興高祖窘平城之圍太宗屈供奉之
恥故孝武憤怒深惟久長之計命遣虎臣浮河絕漠窮破虜庭當
斯之役黔首隕于狼望之北財幣糜于盧山之壑府庫單竭杆柚
空虛算至舟車貲及六畜夫豈不懷慮久故也遂開河西四郡以
隔絕南羌收三十六國斷匈奴右臂是以單于孤特鼠竄遠藏至
於宣元之世遂備蕃臣關徼不閉羽檄不行由此察之戎狄可以
威服難以化狎西域內附日久區區東望扣關者數矣此其不樂
匈奴慕漢之效也今北虜以破車師勢必南攻鄯善棄而不救則
諸國從矣若然則虜財賄益增膽勢益殖威臨南羌與之交連如
此河西四郡危矣河西旣危不得不救則百倍之役興不貲之費
發議者但念西域絕遠卹之煩費不見先世苦心勤勞之意也方
今邊境守禦之具不精內郡武衛之備不修敦煌孤危遠來告急
復不輔助內無以慰勞吏民外無以威示百蠻蹙國滅土經有明
誠臣以爲敦煌宜置校尉案舊增四郡屯兵以西撫諸國庶免折

衝萬里震怖匈奴

班勇請復置副校尉居敦煌長史屯樓蘭對

昔孝武皇帝患匈奴疆盛兼總百蠻以逼障塞於是開通西域離其黨羽論者以爲奪匈奴府藏斷其右臂遭王莽篡盜徵求無厭胡夷忿毒遂以背叛光武中興未遑外事故匈奴負疆驅率諸國及至永平再攻敦煌河西諸郡城門晝閉孝明皇帝深惟廟策乃命虎臣出征西役故匈奴遠遁邊境得安及至永元莫不內屬會問者羌亂西域復絕北虜遂遣責諸國備其逋租高其價值嚴以期會鄴善車師皆懷憤怨思樂事漢其路無從前所以時有叛者皆由牧養失宜還爲其害故也今曹宗徒恥於前負欲報雪匈奴而不尋出兵故事未度當時之宜也夫要功荒外萬無一成若兵連禍結悔無及已况今府藏未充師無後繼是示弱於遠夷暴短於海內臣愚以爲不可許也舊敦煌郡有營兵三百人今宜復之復置護西域副校尉居於敦煌如永元故事又宜遣西域長史將

五百人屯樓蘭西當焉耆龜茲徑路南疆寒鄯善于闐心膽北扞匈奴東近敦煌如此誠便

魏徵諫迎高昌王麴文泰入朝

中國始平瘡痍未服若徵有勞役則不自安往年文泰入朝所經州縣猶不能供况加於此輩若任其商賈來往邊人則獲其利若爲賓客中國卽受其弊矣漢建武二十二年天下已寧西域請置都護送侍子光武不許蓋不以蠻夷勞弊中國也今若許十國入貢其使不下千人欲使緣邊諸州何以取濟人心萬端後雖悔之恐無所及

魏徵諫披高昌地爲州縣

陛下卽位高昌最先朝謁俄以掠商胡遇貢獻故王誅加焉文泰死罪止矣撫其人立其子伐罪弔民道也今利其土屯守常千人屯士數年一易辦裝資離親戚不十年隴右且空陛下終不得高昌圭粒咫尺助中國費所謂散有用事無用

褚遂良諫置安西都護書

古者先華夏後夷狄務廣德化不爭荒遐今高昌誅滅威動四夷然自王師始征河西供役飛米轉芻十室九匱五年未可復今又歲遣屯戍行李萬里去者資裝使自營辦賣菽粟傾機杆道路死亡尚不計罪人始于犯法終于惰業無益于行所遣復有亡命官司捕逮株蔓相牽有如張掖酒泉塵飛烽舉豈得高昌一乘一卒及事乎必發隴右河西耳然則河西爲我心腹高昌它人手足也何必耗中華事無用昔陛下平頡利吐谷渾皆爲立君蓋罪而誅之伏而立之百蠻所以畏威慕德也今宜擇高昌可立者立之召首領悉還本土長爲藩翰中國不擾

駱宏義討賀魯策

永徽六年命程知節等五將軍帥師出葱山道以討賀魯宏義上此策

安中國以信馭夷狄以權禮有變通也賀魯保一城方寒積雪謂唐兵必不來宜乘此一舉滅之遷延及春且生變縱不牽連諸國必遠迹遁去且兵本誅賀魯而處密處木昆等亦各欲自免若留

不進彼與賀魯復合矣今雖嚴冬風勁兵苦鞞墮又不可久留費
邊糧使賊得堅黨附賒死期也請寬處月處密等罪專誅賀魯禍
務本不可先治枝葉也願發射牌處月處密契苾等兵齋一月食
急趨之大軍住憑洛水上為之景助此驅戎狄攻豺狼也且戎人
藉唐兵為羽翼今胡騎出前唐兵蹶後賀魯窮矣

薛仁貴討賀魯疏

臣聞兵出無名事故不成明其為賊敵乃可服今泥熟不事賀魯
為其所破虜係妻子王師有於賀魯部落轉得其家口者宜悉取
以還厚加賚遣使百姓知賀魯為暴而陛下至德也

郭元振論吐蕃請罷四鎮兵披十姓地疏

上此

通天中吐蕃請和其大將論欽陵請去四鎮兵分十姓之地朝廷遣元振報聘因察其事宜還

利或生害亦生利國家所患唯吐蕃與默啜耳今皆和附是將
大利於中國也若圖之不審害且隨之欽陵欲裂十姓地解四鎮
兵此動靜之機不可輕也若直遏其意恐邊患必甚於前宜以策

緩之使其和望勿絕而惡不得萌固當取舍審也夫患在外者十
姓四鎮是也患在內者甘涼瓜肅是也關隴屯戍向三十年力用
困竭脫甘涼有一日警豈堪廣調發邪善爲國者先料內以敵外
不貪外以害內然後安平可保欽陵以四鎮近已畏我侵掠此吐
蕃之要然青海吐渾密邈蘭鄯易爲我患亦國家之要今宜報欽
陵曰四鎮本扼諸蕃走集以分其力使不得併兵東侵今委之則
蕃力益彊易以擾動保後無東意當以吐渾諸部青海故地歸於
我則俟斥部落還吐蕃矣此足杜欽陵口而和議未絕且四鎮久
附其倚國之心豈與吐蕃等今未知利害情實而分裂之恐傷諸
國意非制御之算

郭元振諫發兵導吐蕃擊娑葛疏

景龍二年突騎施酋娑葛與鄯特闐駝等不和忠節將兵部尚書宗楚客請發兵導吐蕃擊娑葛時元振爲安西大都護上

疏論延議不從乃遣御史中丞馮嘉賓持節安撫忠節除牛師獎安西副都護領甘涼以西兵被徵吐蕃討娑葛爲高知其謀與執忠節嘉賓師獎等陷安西四鎮路絕

國家往不與吐蕃十姓四鎮而不擾邊者蓋其諸豪泥娑羅等屬
國自有携貳故贊普南征身殞寇庭國中大亂嫡庶競立將相爭

權自相翦屠士畜疲癯財力困窮顧人事天時兩不諧契所以屈志於漢非實忘十姓四鎮也如其有力後且必爭今忠節忽國家大計欲爲吐蕃鄉導主人四鎮危機恐從此啟吐蕃得志忠節亦當在賊掌股何爲復得事我哉往吐蕃於國無有恩力猶欲爭十姓四鎮今若效力樹恩則請分于闐疏勒者欲何理抑之且其國諸蠻及婆羅門方自嫌阻藉令求我助討者亦何以拒之是以古之賢人不願夷狄妄惠非不欲其力懼後求無厭益生中國事也臣愚以爲用吐蕃之力不見其便又請阿史那獻者豈非以可汗子孫能招綏十姓乎且斛瑟羅及懷道與獻父元慶叔僕羅兄倭子俱可汗子孫也往四鎮以他匄十姓之亂請元慶爲可汗卒亦不能招來而元慶沒賊四鎮淪陷忠節亦嘗請以斛瑟羅及懷道爲可汗矣十姓未附而碎葉幾危又吐蕃亦嘗以倭子僕羅并拔布爲可汗矣亦不能得十姓而皆自亡滅此非他其子孫無惠下之才恩義素絕故也豈止不能招懷且復爲四鎮患則册可汗子

孫其効固試矣獻又遠於其父兄人心何絲卽附若兵力足取十
姓不必要須可汗子孫也又請以郭虔瓘蒐兵稅馬於拔汗那往
虔瓘已嘗與忠節擅入其國臣昔在疏勒不聞得一甲一馬而拔
汗那挾盆侵擾南導吐蕃將佉子以擾四鎮且虔瓘往至拔汗那
國四面無助若履虛邑猶引佉子爲敵况今北有娑葛知虔瓘之
西必引以相援拔汗那倚堅城而抗于內突厥邀伺于外虔瓘等
豈能如往年得安易之幸哉

狄仁傑諫發兵戍疏勒四鎮

天生四夷皆在先王封域之外東距滄海西隔流沙北橫大漠南
阻五嶺天所以限中外也自典籍所紀聲教所暨三代不能至者
國家旣已兼之詩人矜薄伐於太原化行於江漢前代之遐裔而
我之域中過夏商遠矣今乃用武荒外邀功絕域竭府庫之實以
爭磽确不毛之地得其人不足以增賦獲其土不可以耕織苟求
冠帶遠夷不務固本安人此秦皇漢武之所行也傳曰與覆車同

軌者未嘗安此言雖小可以喻大臣伏見國家師旅歲出調度之費徂以寢廣右戍四鎮左屯安東杼軸空匱轉輸不絕行役既久怨曠者多上不是恤則政不行政不行則害氣作害氣作則蟲螟生水旱起矣方今關東薦飢蜀漢流亡江淮而南賦斂不息人不復本業相率爲盜本根一搖憂患非淺所以然者皆貪功方外耗竭中國也昔漢元帝納賈捐之謀而罷珠崖宣帝用魏相之策而棄車師田貞觀中克平九姓册拜李思摩爲可汗使統諸部夷狄叛則伐降則撫得推亡固存之義無遠戍勞人之役今阿史那斛瑟羅皆陰山貴種代雄沙漠若委之四鎮以統諸蕃建爲可汗遣禦寇患則國家有繼絕之美無轉輸之苦損四鎮肥中國罷安東實遼西省軍費於遠方並甲兵於要塞恒代之鎮重而邊州之備豐矣且王者外甯容有內危陛下姑敕邊兵謹守備以逸待勞則戰士力倍以主禦客則我得其便堅壁清野寇無所得自然深入有顛躓之慮淺入無虜獲之益不數年一二虜不討而服矣

韋湊諫募關中兵往安西討擊疏

開元時四鎮經略安撫使郭虔瓘奏請募關中兵萬人往安西討擊曾給公乘兼公熟食詔許之韋湊上疏諫不從後虔瓘

無克獲之功

臣聞兵者兇器不獲已而用之今西域諸蕃莫不順軌縱鼠竊狗盜有成卒鎮兵足宣式遏之威非降赫師之怒此師之出未見其名臣又聞安不忘危理必資備自近及遠強幹弱枝是以漢實關中徙諸豪族今關輔戶口積久逋逃承前先虛見猶未實屬北虜犯塞西戎駭邊凡在丁壯征行略盡豈宜更募驍勇遠資荒服又一萬行人詣六千餘里咸給遞馱並供熟食道次州縣將何以供秦隴之西人戶漸少涼州已去沙磧悠然遣彼居人如何得濟又萬人賞賜費用極多萬里資糧破損尤廣縱令必克其獲幾何倘稽天誅無乃甚損請令計議所用所得校其多少卽知利害况用者必賞獲者未量何要此行頓空畿甸且上古之時大同之化不獨子子不獨親親何隔華戎務均安靖泊皇道謝古帝德慙皇猶尚綏懷不從征伐有占風規雨之客無越海踰山之師其後漢武

膺圖志恢土宇西通絕域北擊匈奴雖廣獲珍奇多斬首級而中國疲耗殆至危亡是以俗號昇平君稱盛德者咸指唐堯之代不歸漢武之年其要功不成者復焉足比議惟陛下圖之

李德裕諫應援安西北庭疏

會昌三年歸夏斯安西北庭部護府總差奏請出師應援時德裕爲相上疏諫乃止

據地志安西去京七千一百里北庭去京五千二百里承平時向西路自河西隴右出玉關迤邐是國家州縣所在皆有重兵其安西北庭要兵便於側近徵發自艱難已後河隴盡陷吐蕃若通安西北庭須取迴紇路去今迴紇破滅又不知的屬黠戛斯否縱令救得便須卻置都護須以漢兵鎮守每處不下萬人從何徵發饋運取何道路今天德振武去京至近兵力常苦不足無事時貯糧不支得三年朝廷力猶不及况保七千里安西哉臣所以謂縱令得之實無用也昔漢宣帝時魏相請罷車師之田漢元帝時賈捐之請棄珠崖郡國賢相狄仁傑亦請棄四鎮立斛瑟羅爲可汗又請棄安東卻立高氏蓋不欲貪外虛內耗竭生靈此三臣者當自

有之時尚欲棄之以肥中國况隔越萬里安能救之哉臣恐蕃戎
多計知國力不及僞且許之邀求中國金帛陛下不可中悔此則
將實費以換虛事卽是滅一迴紇而又生之恐計非便

國朝志

國朝志

國朝志

新疆圖志卷九十二

奏議二 國朝 左宗棠一

遵 旨陳明擬辦事宜摺

官軍出關分起次第行走摺

請飭部議出關官軍應增正餉片

出關各軍餉數及糧料運腳請飭部議摺

出關諸軍餉數糧價運腳辦理摺

出關各軍運腳難拘定例片

嵩武軍在哈密墾荒片

附額勒和布多布沁扎木楚杜嘎爾摺

覆陳移設糧臺事宜摺

附景廉摺

遵 旨陳明擬辦事宜摺

竊臣於十一月初九日准兵部遞到火票軍機大臣字寄十月二

十九日奉

上諭前因肅州克復加恩以左宗棠協辦大學士並

賞給一等輕車都尉世職本日復明降

諭旨將穆圖善等分別加恩獎叙以示論功行賞用彰勞肆現在
關內肅清隴右大兵雲集自應乘此聲威分路西征景廉駐紮古
城兵力單薄亟應添派勁旅以圖進取金順所部尙有二十營若
與景廉合在一處則兵威較壯景廉本有請飭金順前赴古城之
奏卽著統率各營尅日馳赴古城相機進剿以期規復烏魯木齊
景廉於金順到後將各隊如何分撥前進之處卽著和衷商辦不
得稍涉意見其額爾慶額馬隊卽著左宗棠飭令隨同金順西進
聽候調遣哈密雖獲勝仗現在是否解圍未據文麟等續報張曜
宋慶所部兵力較厚該提督等久歷戎行辦事奮勇朕所素知著
卽督率所部馳往哈密駐紮會同文麟明春等相機防勦遇有軍
情緩急均准會銜奏事穆圖善所部馬步各隊久駐涇州徒置無

之地著卽飭令該統領等分起前赴安敦玉一帶駐紮以爲諸軍後繼該將軍現在奏請陛見著將各隊分派起程後再行來見面授機宜以上各軍經朕酌量分派後該將軍等接奉此旨卽行奮速前進不得託詞耽延倘有玩泄從事朕必當按律懲辦決不寬貸至各該軍馳赴關外糧餉一切及轉運事宜責任綦重必須先事預籌並督飭地方官悉心經理帶兵大員其勢難於兼顧左宗棠身任兼圻責無旁貸著卽統籌各軍所需糧餉軍火等項每月應用若干寬爲預備陸續轉輸毋令稍有缺乏如果各該軍逗遛不進則罪在主將儻因糧餉不繼致誤戎機朕惟左宗棠是問關外情形究竟若何糧運道路若何鎮迪以東諸總督統轄之地著卽詳細查明繪圖呈覽河州狄道回情是否安貼該大臣督辦糧運自應駐紮肅州蘭州省城祇有藩臬駐紮是否足恃西甯安插各回衆能否不滋事端並著左宗棠據實具奏左宗棠所部各隊久在邊陲其中疲乏者諒亦不少自應分別遣撤將得力之師分

禁各要害以資彈壓值此餉項支絀之時尤宜汰弱留強以節糜費欽此跪誦之下欽仰我

皇上軫念西陲洞囑邊務際此關隴肅清爲邊塞一勞永逸之計申命諸將尅期出關疆臣總司糧餉分別責任迅赴戎機在事文武諸臣懍遵

聖諭敢不殫誠竭慮以求仰慰

宸厯竊維由肅州出嘉峪而西本漢唐行師大道關內外風土相同非有洪濤巨浸崇山峻嶺足妨戎馬也安西玉門敦煌近雖遭白逆股匪擾掠一空然使關內之糧足供裹帶車馱隻足供周轉無庸仰給安西出關之兵何憚不進近時軍情無復以出關爲苦者以此然徒言出關固尙非難至由安西抵哈密計程十一站千里而遙經由戈壁無臺站無水草砂礫縱橫人馬每多困躓中間僅安西城北四站馬蓮井尙可支帳小憩以僮汲飲而亦未可久留過此又七站始抵哈密回城地暖而腴爲纏頭回族聚居之

所軍興以來音耗闕絕近被白逆股匪竄擾是否有餘糧足供採買更無從知臣前在肅與諸軍集議官軍分起次第行走必先將甘涼採買糧料運存肅州又由肅州出關運至玉門然後頭起開拔至玉門又用其私駝轉搬玉門存糧以赴安西騰出官駝官車轉還第二起軍糧而後第二起繼進餘軍仿照辦理此抵安西州作一停頓又裹糧進哈密如此層遞銜接人畜之力方稍舒展而士氣常新可免意外之慮矣至由哈密前進所有糧運事宜斷非臣力所及自古至今從未有運涼甘肅之糧濟哈密以西軍食者語云千里饋糧士有飢色言其不宿飽也今涼甘肅之糧運哈密計程實近三千而所歷又皆兵燹之餘砂鹵之地其勞費顧待問哉

諭旨飭金順額爾慶額由哈密進古城與景廉會師金順等至安西州搬齊糧料必一面遣人赴哈密詢訪就近堪資採買者若干以定進止如就近有可設措自不須轉搬安西存糧以節勞費而

張曜所部遵

旨進哈密卽可藉資其糧以進時距麥熟之期亦當不遠舊糧漸進新穀旋升後此續進之軍方可相時而動臣所擬宋慶之軍及

臣部精選之軍蓄銳待發自可不誤師期

諭旨飭穆圖善率所部進駐安敦玉爲諸軍後繼

飭臣籌糧餉軍火等項寬爲預備陸續轉輸毋令稍有缺悞穆圖善欽奉

諭旨感激奮興固不待言臣具有天良又新蒙

特恩至優極渥苟有一籌可展竟敢稍惜心力致煩

聖厯撫衷自問何以爲安顧無如時地足以限之關內之搜購無餘非待明秋無從加採而前進各軍能否就近採買騰關外存糧以供繼進之軍又難懸擬若勉挪前進各軍糧料以應穆圖善則前進各軍中途缺食大局不堪設想若不挪前進存糧以應穆圖善續至之軍一飽無時又將何策以善其後故於接到穆圖善咨

時業將一切實在情形縷悉咨覆請其將隊伍暫駐涇州平涼一帶遵

旨陛見面陳此時急赴安西於大局有損無益確實情由伏候

聖慈詳示機宜俾有遵循大局之幸亦臣與穆圖善之幸也至金

順張隴兩軍各有專餉無待臣籌額爾慶額所統吉林馬隊二百

騎黑龍江馬隊百騎穆圖善委解存餉三萬兩甚爲充裕其自挑

涼州滿營百騎及臣撥交桂錫楨馬隊一營一起臣已各發滿餉

四箇月交額爾慶額並撥購到口馬二百五十匹健駝二百隻洋

馬礮軍械各件以壯其行出關各軍所需軍火現解肅州者堪資

一年之用如遇各軍餉到稍遲必應墊發者臣自當相其緩急應

之惟臣軍餉項奇絀久在

洞鑒之中如各軍視爲公中糧臺取攜自便無論點金乏術缺悞

必多且將來欸目轉輻過多從何銷算此非由部臣派員專立一

案隨時考核嚴切催提不可非臣力所及也

諭旨 詢河州狄道回情是否安帖該大臣督辦糧運自應駐紮
肅州蘭州省城祇有藩臬駐紮是否足恃西甯安插各回衆能否
不滋事端並著左宗棠據實具奏 臣維甘肅一省變亂十餘年被
禍慘烈甲於天下所以然者回變與髮逆捻逆不同而甘回與陝
回起衅緣由又異當時辦法未能苦心分明遂致紛紜日甚不可
收拾也陝回之禍由於漢回構怨已久起衅之故實由漢民而匪
回乘機構變並敢戕害國防大臣據地阻兵法難曲貸迨官軍屢
與痛剿凶悍首逆馬政和楊文治于彥祿均已授首悍賊殄滅已
多所存無幾

國法已伸其餘首從各逆既俯首輸誠自可概邀

寬典安置甘境與漢民異處以杜衅端通計陝回七八十萬現存
者除白彥虎股內二千有奇此外安插甘境者不過六萬餘衆而
已甘回雖不如陝回之悍然人數較多自乾隆年間新教潛入內
地久懷入室操戈之心且圖謀不軌時與

國爲仇橫互北數省無所畏忌是法所必誅時不可緩者也辦法宜嚴首惡不可稍縱幸託

皇上福庇事機順利首逆馬化澂父子馬桂元兄弟及馬四等次第伏誅其餘各自懷異志者亦已悉數芟夷而後安西肅州甘州涼州一帶二千餘里並無回族聚處實漢唐以來未有之奇功竊計後此疆臣能慎擇廉明守令分布各郡縣毋有擾累興教勸學潛移民俗化其愚頑則雖百世相安可也至西甯本蒙漢回番雜處之區循化貴德巴燕戎格尤多回番而漢民頗少由西甯徑達關外有路可通不必取道嘉峪臣飭劉錦棠於明春解凍時親歷各隘擇要修築堡寨調撥兵勇分駐絕關外相通蹊徑以便盤詰而畫郊圻就回番之情言之番愚回狡一經不法之徒造謠鼓煽易生事端蓋新定之區恩信孚洽未久也然一經持平辦理旋即帖服察看情形轄境均尙安帖不獨河狄也臣宗棠料理糧運事宜畢仍回蘭州一爲安插肅州漢回難民一爲河湟客土難民有

准於收獲後遷徙安插者應速籌辦理以期永久一爲欠項積久
遣徹無資而蒙

恩飭撥部款百萬兩一時難以速到應及早預爲籌畫庶明春分
別辦理易於措手至糧運事宜繁重仍在得人而理臣不駐肅州
亦可隨時料量耳臣出省時將臣軍營務交河湟案內擬保陝西
遇缺題奏知府並

賞加鹽運使銜張宗翰及總兵范秉誠督辦城防標兵事交中軍
副將崇志料理而總司其成者藩司崇保臬司楊重雅也幸一切
經理得宜民情恬謐城野市肆晏然無驚俾臣無內顧之憂得以
一意辦賊而前敵所需軍火軍裝軍餉無不應念而至不但毫無
缺悞並有臣未及催提而委解已到者臣實深資其力合無仰懇
天恩加以甄錄崇保請

賞加頭品頂戴楊重雅請

賞加布政使銜崇志請

交軍機處記名遇有甘肅總兵缺出請

旨簡放張宗翰遇有甘肅道員缺出儘先題奏並

賞加按察使銜閩浙補用總兵范秉誠以總兵記名請旨簡放並

請

賞給清字勇號以示鼓勵出自

恩施謹遵

旨據實一切擬辦事宜恭摺馳

奏伏乞

聖鑒訓示施行

同治十二年十
二月初十日

同治十二年十二月二十二日內閣奉

上諭左宗棠奏請將辦理營務城防各員獎勵一摺左宗棠前次
出省督兵勦賊派委布政使崇保等在省經理軍裝軍餉一切均
無缺悞尙屬著有微勞自應量予獎叙布政使崇保著賞加頭品
頂戴按察使楊重雅著賞加布政使銜補用總兵范秉誠著以總

兵記名請旨簡放並賞給博奇巴圖魯名號以示鼓勵副將崇志著交軍機處記名遇有甘肅總兵缺出請旨簡放知府張宗翰著遇有陝甘道員缺出儘先題奏欽此

官軍出關分起次第行走摺

竊肅州克復大軍應卽乘勝出關速圖掃蕩人皆知之而能言之微臣始念亦謂巧遲不如拙速及體察軍情詳審局勢竊有不敢輕議者請爲我

皇上敬陳之一在籌出關之兵宜審也通計攻肅各軍金順宋慶徐占彪及臣節次調派馬步各起共六十餘營可謂多矣然攻堅既久損折實多受傷成廢者亦不下數千之衆皆所稱精銳之選也徐占彪所部蜀軍馬步十三營前後陣亡將士五百餘員名帶傷者二千四百有奇宋慶一軍亡傷之數近千名而染病物故者亦數百計金順所部步軍卽胡世英之英禮十營本非佳選又由甯夏拔赴涼州時逃亡不少雖幸金順隨時補輯得以成軍每戰

身先作其勇氣然陣亡者數百名受傷殘廢者亦數百計此臣在肅時所深悉者肅城克復後臣與諸軍熟商非從新整理難收實效金順宋慶徐占彪均以爲然比飭隨帶之總兵戴洪勝余起立提督金慶元副將歐陽吉星等歸頭品頂戴記名提督譚上連統領併成五營益以三營馬隊駐守肅城修葺城壕俾成雄鎮飭肅州鎮總兵章洪勝接統楊世俊舊部馬步四營及親兵小隊駐嘉峪重修邊城以嚴鎖鑰並撥馬步小隊分駐關外以通玉門之氣其玉門靖逆營遊擊缺委隨營總兵銜副將陳南波署理安西協副將缺委隨營提督吳次漢署理敦煌沙州營參將缺委副將聶福田署理各令挑汰存營孱弱兵丁而募山內獵戶補之各足一營五百名實數照內地防勇章程以月餉責其防守本境兼護運道緝遊勇臣巡視嘉峪關畢回肅卽撤徐占彪馬步七營分別回籍挑留精壯併成馬步六營於肅城外擇水草便利處紮營按日操練亦使其養傷待愈耳時因出關期近諸軍整理需時奏調張

曜嵩武軍由鎮番涼州赴肅而嵩武軍到肅後軍食日增甘涼訂買運肅之糧不敷接濟各軍之用不得已商請宋慶率所部回涼州整理兼以就食宋慶又以舊部在豫者多募補易於集事而金順出關在即擬以所部現存精壯聽金順挑補額數俾期捷便臣服其力顧大局深知緩急並愜私懷旋並撥副將馮桂增馬隊一營布洛斯螺絲後膛開花大礮一尊飭總兵鄧增帶領礮手隨金順出關以從其欲計此時整理就緒壁壘一新矣張曜一軍馬步十四營隊伍整肅士飽馬騰堪稱勁旅臣並益以新製連架劈山礮十尊布洛斯二號螺絲後膛礮一尊七嚮後膛礮十桿其涼州副都統額爾慶額馬隊除自挑涼州滿營百騎外穆圖善撥交吉林二百騎黑龍江一百騎臣慮其單飭總兵桂錫楨帶所部馬隊一營一起約四百騎歸其統帶計金張額三軍出關馬步共一萬數千辛皆精實可用數月而後仍可調撥勁軍陸續繼進如此士氣常新而不竭糧運常裕而不飢以之制關外客土逆回自操十

全之算一在籌出關之糧運宜審也肅州安西共隸一道而產糧
贏絀各屬攸殊肅州及高臺腴地也安西玉門頗多砂磧而敦煌
爲上腴軍興以來民困於逆回之擾掠復苦於軍營之捐攤久矣
民人存者不過十之三四地畝荒廢居其大半官軍藉興屯之名
先給領籽種牛價抵算採買糧銀搜括仰勒戶口流亡自白逆竄
出關外官軍復沒國莊被陷安敦玉彫敝之狀較甚從前臣在肅
見難民絡繹入關恐轉徙日多荒地無人耕墾籌銀二萬兩分給
三州縣並撥寒衣萬套賑之冀留此災黎盡力屯墾庶異時餘糧
出糶關外各軍可就近採買稍節勞費也然目前軍食不能取給
安西則固不待言甘涼肅素稱腴地頻年戎馬被害最酷自徐占
彪偏師徑搗肅州肅回縮退諸軍戡定河湟甘涼道路漸次肅清
農民得安耕穫倖獲中稔兩年以來尙供官軍採買然死亡既多
川原耕種不過十之三四其旱地更無過問者臣由蘭到肅途間
疊據士民紛遞紛呈求免採買比經再三開導除留民食及籽種

外諭其悉數出糶勿任居奇幸三郡民情樸愿又知官軍誓滅此
賊且能不擾遂得集有成數通計涼甘肅三郡訂買市斗軍糧十
六萬三千餘石按照額徵倉斗則三十餘萬石幾敵通省常額年
賦雖優議價值每市斗一石重三百餘觔給銀四兩而民間繳納
不前市價驟長每石竟至六七兩之多據甘州府縣稟報棍徒喬
良廷卽喬鐸李太和造謠煽惑阻納官糧以致市肆抬價居奇貧
民糶食無出軍民均困臣察訪得實立飭將喬良廷李太和杖斃
並以署甘涼道蕭宗鑒辦理顛預撤任查辦訪聞局員候選知縣
杜輔仁甘標後營都司林長興有侵欺情事交調署甘涼道黃慶
章訊實詳參自此民間交糧乃漸踴躍然以訂買糧料總數供金
順張隴額爾慶額三軍食用及運糧車馱駝隻防營所需食用算
至明歲六月新熟尙短糧料市斗二萬餘石現擬盡括額徵本色
及各標營季糧陸續填補尙未知能否足敷且甘肅地氣高寒麥
秋雖在六月而民間割麥完畢必應堆集成垛俟其稿薶結脫始

便碾打上市臣此次七月十九日由蘭州啟行八月十二日始抵肅州沿途村舍麥稔雖多而繳官上市者少明歲節候雖早計民間繳納新糧必俟八月陳糧尙應寬籌兩月庶新熟之交得資接濟此籌糧甘苦實在情形也就轉運言之自涼州至肅州共九百里又自肅州至嘉峪關至玉門縣三百六十里玉門至安西又二百里共一千四百餘里路多砂石用駝爲宜惟駝隻非農所蓄向來民間所蓄惟騾馬牛驢以供農事藉應差徭所有惟木輪大車不耐負重行遠頻年賊回擾掠牲畜極少差車無供上年成祿出關強拉差車數百輛甫至玉門車夫棄車逃回并騾馬亦拋置不顧自是更無從措手臣於初夏派弁三路出口採駝三千又偏值蒙古駝少價高採獲尙不及一千二三百隻報到者僅祇六百餘隻臣過甘郡時道府請重價僱用民車每運糧百斤行百里許給銀四錢其應出差車許給銀二錢計四十餘日之久民車差車運糧料到局尙不滿三千石幸臣前調集各營官騾一千六百餘先

後到齊起運勉資周轉而前用民價在蘭州平涼所雇商民車馱駝隻及袁保恒在河南雇辦車輛亦陸續搭運軍裝軍火抵甘於是轉運稍旺肅州乃有存糧以後可以不須重價雇民車然通計由涼州甘州採糧運肅由肅駝運至安西州合計民運車馱駝隻脚價及官騾官駝官車員弁人夫薪糧牲畜草料口袋什物局費一切攤算每糧百斤需銀拾一兩七錢內外其勞如此其費如此夫豈此時財力所堪若非預籌撙節而動言用衆恐官軍之餉餽不繼糶臺之儲峙早空不但後時不能保此不竭之源卽目前出關之師亦且時憂飢潰此轉運艱難之實在情形也竊維自古關塞用兵在精不在多方全盛時壽用兵卽先籌芻粟如漢趙充國古稱名將其駐軍酒泉卽今之肅州治敦煌卽今之安西州治所籌兵事重屯田而罷騎兵留步兵萬人藉省大費三奏力諍行之卒效至今言西北兵者莫能外也乾隆間先臣兆惠苦守伊犁數月維時北路兵阻不前其深入者僅精兵數百卒能力解重圍宣

威絕域約計當時北路士馬多亦不過數千然則道遠運艱不能
用衆即古今承平無事官私充足時亦無以異可知也今擬出關
之金順張曜額爾慶額所部馬步已一萬數千合之員弁丁役人
夫將近兩萬值哈密解嚴賊蹤向吐魯番一帶竄走師行二千里
尙未知能否及賊若遞擬以大軍接踵前進雖承平無事官私充
裕時猶或難之矧當禍亂十年人物彫殘財用匱絕之日乎臣在
肅時商之各軍汰疲乏冗雜弁兵以求精資遺傷殘成廢弁兵以
省累察張曜一軍銳氣方新作爲頭起金順一軍次之額爾慶額
又次之宋慶一軍整理需時軍裝駝隻均需增添購辦請留俟明
年秋後繼發臣併擬於所部整銳足恃諸軍內再精選數千屆時
慎擇統將率之同行如天之福甘涼安肅明歲豐稔西師飽騰再
分起層遞而前如行衽席庶邊塞肅清可操全算計期不過稍遲
數月而局勢穩矣否則師行荒徼旣不能因糧於敵復不能隨地
征糧士馬苦於長征求一飽而不得正恐未及遇賊軍情先搖於

局勢無益而又害之且戰陣之事最忌於前突後竭行軍布陣壯
士利器厚集於後則前隊得勢鋒銳有加戰勝而兵力愈增必勝
之著也若全力悉注前行一洩無餘設有蹉跌無復後繼是乃危
道詩言綿綿翼翼傳稱彼竭我盈蓋皆注意後路之說况出關之
師所應加意者不僅哈密以西客土客回似成効不在欲速取威
不僅一戰也區區之愚所爲不能自釋者以此至關外軍事除景
廉每年尙間有緘牘往來餘則并未接過隻字卽鎮迪一道名雖
隸陝甘總督管轄而實則由烏魯木齊都統及各大臣就近督率
公事一切由其主持數十年前卽是如此臣無從過問所有哈密
以西糧運事宜應由出關各軍到地自行籌畫臣固未能懸揣亦
勢力所不逮非預爲諉謝也謹將籌辦出關事宜據實陳
奏伏乞

聖鑒訓示施行

同治十二年十
二月初十日

請飭部議出關官軍應增正餉片

再用兵之要先審軍情古人所以於擇將時兼聽與人之誦也此
次諸軍乘勝出關士氣倍奮况諸統將新承

恩旨受

寵若驚所部樂事赴功自不待言惟餉饋盈絀隱繫軍情有急須
體察者各軍餉事均由協餉省分解濟本有一定數目其解到多
寡實數臣無由知然嘗詢之金順張曜宋慶得其大畧以協餉實
數按照員弁兵勇長夫均勻攤算計每名每年可得實銀三十餘
兩餘除留備製造添補軍需軍裝購買駝隻之用別無餘賸至糧
料價值轉運腳費按道里遠近牽算計每人所食月須淨糧四十
五觔馬隊一騎日須料五觔草十二觔兵勇長夫兩名所須食糧
月須九十觔均不可少照步軍攤算馬隊一營二百五十騎抵步
隊一營五百人長夫二百名之數其大略也各軍馬步兵勇每月
應得實餉僅止三兩有奇若按照食用糧料腳價攤扣則馬步兵
勇將所得實餉盡數賠繳尙須找銀繳局萬無是理若不按名按

騎攤扣則糧料價值轉運脚費等項又將何出應懇

天恩敕下戶部兵部會議出關各軍應得正餉每名每月若干兩
責成協餉省分按數如期解濟此外糧料價值運脚共計需銀若
干兩或責成協餉省分按月搭解毋得延誤如協餉省分力有不
及務須及早奏派鄰省按月劃款協濟不令虛懸庶出關之軍餉
饋均歸有著雖遠道轉戰無殊近履階庭軍情益奮諸統將亦得
所藉手以圖報稱壹意整軍討賊勿敢遷延功效可必而

朝廷以餉饋充絀課其戎機遲速法行令肅於軍政實有裨益應
敕下戶部揀派明幹司員將出關各軍餉需專立一案按月稽覈
具報如協解省分稍有遲誤及餉到而各軍逗留不進咎有攸歸
庶餉需不催自急軍情慰愜無可藉口理合附片具陳伏乞

聖鑒訓示施行

同治十二年十
二月初十日

出關各軍餉數及糧料運脚請飭部議摺

竊臣前奏出關諸軍餉饋盈絀隱憂軍情急須體察一片欽奉

硃批該部速議具奏旋准戶部鈔錄原摺奉

旨依議欽此。維出關諸軍現惟金順張曜額爾慶額三起除額爾慶額所部馬隊由穆圖善派交吉沐二百騎黑龍江一百騎額爾慶額自挑涼州滿營百騎外。撥交總兵桂錫楨馬隊一營一起共三百七十五騎歸其統帶應領月餉糧料運脚等項穆圖善撥交者由穆圖善支應桂錫楨一營一起由。支應其涼州滿營之一百騎亦由。支應不計外張曜一起步十二營馬二營業經張曜開報其糧料運費由河南支應金順併統成祿舊部馬步雖名三十餘營然步隊照五百人一營實數馬隊照二百五十騎一營計算金順自定二十營此外又由。撥交副將馮桂增馬隊一營總計金張額三軍馬步約共一萬七千餘名騎并明春所帶成祿舊部二千餘名騎合計在內加之員弁丁役人夫則近兩萬矣以糧料價值轉運脚費而言計由涼甘探運肅州由肅州轉運玉門安西州所需民運車騾馱隻脚價員弁人夫薪糧牲畜草料口

新編國志
袋什物局費一切均勻攤算每糧百觔約需銀十一兩七錢上下
料價稍減而脚價則一運道近則脚價猶少運道遠則脚價增多
現籌出關轉運脚價多於糧價數倍者兵燹之後人物彫殘絲毫
不能借資民力與承平時迥異無論子遺之民尙須官賑賑糧尙
須官運也臣於上年十二月初十日拜發各摺片業經詳細陳明
而以餉饋盈絀隱繫軍情急須體察懇

飭戶部兵部會議者以此茲戶部奏稱向來各路軍營需及一切
雜支均由各該大員酌量情形查照例章覈定數目奏請由部指
撥從未有先由部臣核定者又稱出關各營共計幾營每營弁兵
若干每月所需正餉若干其糧料價值運費按照時價貴賤道里
遠近計算共需若干戶部均屬無從知悉請

旨飭下左宗棠查明出關各營弁兵實數所需正餉糧料運脚等
項按照例章并體察關外情形每月實在需銀若干及出關各營
原撥餉項分晰聲叙先行奏明臣維現在出關各軍除額爾慶額

馬隊各營由臣與穆圖善撥交其餉糧轉運脚價由穆圖善與臣餉項內照舊劃給毋庸另籌宋慶一軍正需整理暫毋庸議其金順一軍除臣撥交馮桂增馬隊一營餉項亦由臣劃給毋庸另籌其自統各營及接統成祿舊部馬步共二十營張曜所部馬步十四營已經陳明在案惟臣於金順張曜宋慶各軍餉項餉章無從知其詳細上年在肅晤談僅得其梗概部議向來各路軍營餉需及一切雜支等項均由各統兵大員酌度情形查照例章覈定數目奏請由部指撥是金順等應奏部臣應撥與臣無干自毋庸置喙其糧料價值時估不同斗石大小舛兩輕重互異以及轉運里數遠近均經臣據實陳明若逐項分晰聲叙未免繁瑣且金順至古城張曜至哈密一切又須從新算起諸軍有無例章可查情形應由其酌度數目應由其核定臣亦無能代籌也臣前因各軍馬步兵勇所得實餉僅三兩有奇按照糧料價值攤扣儘數賠繳尚須找銀繳局若不攤扣則糧料價值轉運脚費等項又將無出

原係實在情形事繫軍情既有見聞不敢緘默故將餉數糧價運脚詳悉陳明上瀆

聖聰請

飭部會議一免諸軍藉口一期迅赴戎機至應否酌中定議諸軍餉饋均歸有著之處無可查照無從核定仍應由戶兵兩部會議除鈔摺咨明戶兵兩部外謹據實直陳伏乞

聖鑒訓示施行

同治十三年二月十六日

出關諸軍餉數糧價運脚辦理摺

竊臣前奏出關諸軍餉數及糧價運脚應由戶兵兩部會議一摺

聲明除額爾慶額所統馬隊金順所統馮桂增一營糧餉脚價由

臣與穆圖善餉項內劃給毋庸另籌外其金順張曜宋慶等出關

各軍餉糧應否酌中定議俾諸軍餉饋有著嗣准部覆金順張曜

宋慶應各將該軍所需正雜糧料等項查照例章並體察關外情

形每月實需銀若干並原撥餉項分晰咨報由臣奏明再由臣核

辦等因已經奏明奉

旨依議欽此臣比恭錄並鈔部文飛咨金順張曜宋慶欽遵辦理
頃接張曜咨報所部嵩武軍馬步十四營按人馬實數每月應支
淨糧料四十三萬六千九百五十觔其管駝騾差弁長夫應支食
之銀糧駝騾應支食之料尙不在內該軍由河南應餉計每月照
章應得正雜餉銀三萬七千八百餘兩若將糧料價值轉運各費
攤扣不但全軍無餉且欠數甚鉅應請奏准將該軍糧運經費作
正開銷俾各營仍得正雜餉欸以資食用津貼其自出關以後軍
裝軍火軍餉等項轉運應請再添撥千兩以清墊欸此張曜所報
軍餉數目也宋慶所部毅軍據報步隊十四營又一旗馬隊一營
又一旗統計步勇七千二百名長夫一千五百餘名馬勇四百名
長夫一百三十六名共計馬步勇夫九千一百三十六名隨員差
弁夫丁不計月需淨糧料四十九萬三千一百餘觔照河南餉章
大建每月支銀四萬二千餘兩小建月支銀四萬一千餘兩前因

出關各軍採糧轉運艱阻萬狀奏明暫由肅州移駐涼州甯夏就近採運糧料供軍價平脚省尙可毋庸議加惟現擬撥馬步勇丁千名馬百餘匹先進哈密放水灌池爲續進開墾之計及將來各營出關所需糧運屆時再照張曜餉事議增乃昭平允至宋慶所稱前因料理出關挪用正餉購辦駱駝千隻現已到營僱駝夫三百名此項駝料夫料每月須銀四千兩應請按月添撥此宋慶所報軍餉數目也金順一軍合明春所部自定馬步三十營人數在一萬以外嗣奉

諭旨明春所部歸其自帶聞金順仍自定馬步二十營所需糧料計已由局發過一千二百萬觔除派提督劉宏發等六營赴古城外金順擬於九月內親帶馬步四營赴巴里坤餘仍屯駐肅州安西該軍馬步餉章與楚軍相仿較之張宋豫軍餉章爲優其在安西糧料均由肅局應付應請作正開銷該軍餉項提解不少頃據額爾慶額桂錫楨等古城來報該處一帶糧料每石重三百餘觔

合銀三兩近因官軍陸續到境景廉定作四兩三錢已爲金順訂
買二萬餘石旋據史念祖等稟報所聞相同似金順全軍撥行可
供十箇月之食但臣所接景廉八月來緘尙云須由關內齎糧前
往金順近日來牘亦以爲然無從揣測按關內採糧由涼州起歷
甘州肅州以達安西計程一千五百六十里合糧料價值車馱駝
隻運脚及各項費用計算每糧料百觔實需銀十一兩七錢有奇
惟由涼州而西抵肅州所採糧料近西一站則運脚之費可遞省
一站故甘屬運脚省於涼肅屬運脚又省於甘也是糧運價值雖
由涼起算而程途遠近卽脚價多寡所關並非以十一兩七錢上
下爲定也原奏亦曾聲叙及之景廉前奏稱科布多烏里雅蘇台
採糧一石運至古城需銀十餘兩勞費甚多已奏停止而以出關
各軍糧料應由關內接濟爲言不知由烏科採運至巴古需銀十
餘兩之多僅與由涼採運至安西所費脚價相等而由烏科採運
至古城一石計重三百餘觔較由涼州運安西計重百觔之價脚

已少三分之一况由安西逾哈密轉運巴古計二十六站一千九百八十七里每百觔又須加運脚過倍乎臣前緘致金順言之頗詳然猶不知巴古一帶本有糧可採價並不昂又可省運費二十餘倍也臣所見所聞言之金順到巴古後萬無舍近求遠舍易求難舍賤食貴之理臣與景廉金順同辦一事所用同係朝廷至艱之餉但論於軍情

國計有裨何庸妄存意見所有金順一軍餉事糧事就所知者據實陳之至查照例章體察關外情形每月實需若干應請

飭金順自行陳明聽部核辦金順既蒙

簡放幫辦大臣本軍事體應自徑陳臣尤不應越瀆也所有諸軍餉數及糧運價脚謹據實覆

奏伏乞

聖鑒訓示施行

同治十三年十月初四日

出關各軍運脚難拘定例片

再部議出關各軍運脚照定例按程核算較臣原奏每糧百觔約需銀十一兩七錢上下數目不無懸殊查例載運脚係專指僱用車騾駝價而言臣原奏關內採運由涼州歷甘肅州以達安西計程一千五百六十里每糧百觔約需銀十一兩七錢上下係合糧價車騾駝隻脚價及員弁人夫薪糧牲畜草料口袋什物局費一切統算在內均勻攤價故與例載專指脚價言者多寡之數不符若專就運脚言之固不至懸殊也且此時甘省新復之區人物凋殘絲毫不能藉資民力與從前承平日久地方完善情形判若霄壤自未可按照成例致誤轉輸現時關內轉解糧餉軍裝軍火官運民運相輔而行民運脚價無論僱用車騾駝馬酌定每運百觔百里均各給銀四錢而額爾慶額出關僱用之民駝則自定百觔百里給脚銀五錢關外食物昂於內地脚價較內地加增現辦情形已難一例也民運脚價之外尙有民夫口食牲畜喂養及應用什物各項一有缺乏立形滯礙停待一日所費更多故必須設

立官局隨時給領酌扣價銀始爲省便雖比民間買價津貼已多而費實不容惜故關內民運百舫百里給腳價銀四錢合之局用津貼實不止四錢關外民運百舫百里給腳價銀五錢合之局用津貼亦尙不止五錢也官運須分途採購車馱分幫派弁夫管理車軸鞍架繩索口袋什物須隨時修整備辦牲畜須按站預備草料醫藥以資養喂車輛損懷牲畜倒斃又須裁併挑換隨時買補填槽所費極繁而總分局員弁夫役護勇工匠薪糧局用正雜諸費尙未計也此項費用指官民運脚而言自應攤入糧價並算約言之則爲一端分言之則欸目瑣碎非俟轉運蕝役專案據實開報請銷急難清理就緒此時就臣所墊過糧價實銀言之除宋慶一軍去歲由甘肅州各局支領糧料已經結算價銀外金順一軍領過糧料截至本年九月內共一千二百萬舫應攤合價銀六十六萬餘兩內收還銀六萬七千五百七十六兩一錢八分尙墊過銀五十九萬餘兩張曜一軍領過糧料截至本年九月上旬止

共支四百七十萬零九百餘觔應攤合價銀二十五萬九千餘兩
內收還銀六千餘兩尙墊過銀二十五萬三千兩合之金順一軍
糧價由臣墊付者已八十餘萬兩此該兩軍未出關以前由甘州
肅州各局就近支領居多故攤扣價銀每百觔約合五兩五錢有
奇若全隊出關以後糧運仍由內地籌供則由涼州遞運安西州
每糧百觔實需銀十一兩七錢有奇安西轉解哈密又須從新起
算程途遠近卽脚價多寡所分路途少一站運費可省一站牽算
分攤費自輕減並非以由涼州至安西州十一兩七錢上下爲定
也前摺已經陳奏所有運脚難拘定例及臣墊過金張兩軍糧價
截至本年九月上旬實數謹附片陳
奏再金順一軍借過臣軍餉銀十二萬兩並未還欸現又允借助
駝隻三四百隻運糧至巴里坤張曜一軍借過臣軍餉銀三萬兩
未還現又借助駝隻運糧至哈密均未在兩軍採運欠項內計算
合併聲明伏乞

聖鑒訓示

同治十三年十月初四日

嵩武軍在哈密墾荒片

再臣前准統領嵩武軍廣東提督張曜來牘現在軍進哈密必就

該處荒蕪地畝開墾以益軍食查該處荒地極多纏回現存者不過二三千人尙多無力耕種者除哈密大臣兩軍已種之地及回民自行耕種外荒地尙數萬畝應否由其儘力墾耕以盡地利臣

維哈密地方本回王邁哈默特世守之業茲纏回離逃荒地無人承耕文明兩軍既已分撥所部耕墾客軍事同一律自可儘力開荒聊佐軍食惟屯田一事名雖同而實則異有初時用兵征剿就地興屯事定入官者爲兵屯現在南北兩路各地皆有之有屬地被賊擾害戶口逃亡官軍討賊於師行地方且耕且戰隨地招徠難民復業雜居耕種比事定後地已開荒成熟仍還之民此卽甘肅近時辦法其始雖名兵屯然地仍歸之民不得謂爲兵屯也其後民歸舊業各安隴畝亦不得指爲兵屯查哈密內附已久素稱

恭順事體本與南北兩路不同纏頭回民雖此時避匿於他方如果屯務辦理得宜自將襁負而至此時官軍就地耕墾既非兵屯應隨時察酌情形遇有哈民來歸卽發賑給種並指給地畝俾得自耕自食或給予僱值令其隨同耕穫俾得自食其力異時官軍拔行地畝開荒成熟哈民復業者必日多一日是官軍開荒於軍食有裨於哈密故業無損而哈密復業得免開荒之勞尤所心願所辦屯務與關內外無殊是視哈密如關內外也庶可仰體

朝廷覆載生成之意至文明兩軍已墾地畝之外尙餘荒地甚多客軍雜處承耕自須約束勇夫凡遇農工交涉彼此勿因爭執而釀事端亦古昔耕者讓畔之義除咨復張曜並咨明文麟明春外謹附片陳明伏乞

聖鑒訓示施行

同治十三年十月初三日

附額勒和布多布沁扎木楚杜嘎爾摺

十二月十六日承准軍機大臣字寄同治十三年十一月十四日

奉

上諭左宗棠奏籌畫移設糧台辦理採糧轉運事宜各摺片等因
欽此遵

旨寄信前來奴才等查烏里雅蘇台地勢寒苦素不產糧所有換防

官兵應需口糧向由科布多十屯征收解交烏城近因收成歉薄
久經停解每年皆係派員赴歸化城採買以供本城兵費因經費
支絀不得不量入爲出是以並無餘存至口北糧台前解景廉軍
營糧石早經掃數運至科城烏城並無芥蒂惟查有遺失標記之
糧二千三百九十九袋半盡係同治九十年間積滯阿爾泰軍台
之糧暴露沙漠將及三年半耗於鼠偷雀啄半腐於雨濕風侵奴才
額勒和布前在察哈爾都統任內奏明發價僱駝轉運始行運解
到烏霉變朽蠹大半不堪食用今春防剿官兵口糧因察哈爾去

冬商駝鮮少招僱不易未能如期報解經前署將軍常順將此項
米石通融借放各營一千一百十九袋檢查現存米石僅止一千

二百八十袋半此烏城積存糧石之實在數目也至喀爾喀各盟雖係產駝之區惟是連年災祲兼被賊擾及供應台站差徭遺失倒斃不可勝數加以景廉金順榮全英廉等疊次採買搜羅殆盡前奉寄諭購辦西征糧台轉運駝隻奴才杜嘎爾等飭令喀爾喀圖什業圖汗等回盟分買健駝四千隻務於年內買齊去後現屆年終車臣汗等三盟尙未呈覆僅據圖盟詳報困苦景况駝隻缺乏無從購買各等情經奴才等以西征糧台需駝挽運刻不容緩無論如何爲難務須竭力採辦毋庸藉詞推諉等因札覆該盟在案惟此項駝隻究竟能否採買足數之處刻下尙難預定此烏城駝難購辦之實在情形也所有遵

旨查明覆奏緣由謹恭摺由驛馳陳伏乞

聖鑒

同治十三年十一月二十六日

覆陳移設糧臺事宜摺

竊臣承准軍機大臣字寄同治十三年十二月十四日奉

上諭袁保恒奏擇定西征糧臺進駐巴里坤摺據稱烏里雅蘇臺科布多兩處設立糧臺均不相宜惟巴里坤爲南北適中之地且緊接大軍之後擬將糧台移設巴城等語糧台轉運事宜關係甚重應否駐巴里坤之處著左宗棠袁保恒和衷商榷奏明辦理移台之後其餉項一切仍由陝甘內地行走必須陝省後路糧臺催提轉解以資接濟左宗棠務當督飭地方各官認真經理毋得稍分畛域致悞事機袁保恒奏稱糧台移設後須撥兵護運並請於舊部皖軍中商調數營此時皖軍能否調撥並著左宗棠能否將應撤之營酌撥馬步若干著該大臣酌度情形與袁保恒會商妥辦張曜宋慶兩軍現在天山南路該軍糧運卽由左宗棠先爲接濟俟移台後應如何統籌兼顧並著左宗棠袁保恒商辦毋誤軍食金順已抵巴城卽著趕緊部署迅速西進金順到古後景廉卽與該都統將進剿機宜妥爲籌辦以期迅速掃逆氛將此由六百里各諭令知之欽此竊維糧臺之設原以支應糧餉軍需俾前敵各

軍得意馳驅無須分心儲峙其必緊居大軍之後者勢所當然
巴里坤距台軍駐紮之古城濟木薩等處爲程七百餘里車駝暢
行無阻台設巴里坤照料易周各軍赴台領運取攜甚便回亂以
來城垣完好如常舊爲北路商賈輻輳之所百貨萃集市廛鱗次
今昔無殊袁保恒稱糧台宜移設巴城是矣惟巴城產糧無多從
前天時地利人和三廠屯田日久荒廢從新經理屯政暫無近功
經理如不得人更滋虛耗金順上年在此採辦軍糧民商分購僅
得七千餘石其明徵也臣原奏北路應兼收烏科一帶新舊之糧
者以此袁保恒所稱移台巴里坤先買古濟之糧次則仍由南路
調運臣思古濟之糧景廉已經訂買巴里坤之糧金順已經訂買
其額爾慶額所買之糧臣已發過價銀暫毋須由台支發若訂買
古城濟木薩之糧運回巴里坤無論古濟之糧未必尙敷訂買且
亦無此辦法也南路涼甘肅安西新訂之糧十九萬石不爲不多
因乏現銀收繳尙欠五萬餘石除供張曜宋慶兩軍及金順留安

西肅州數營外涼甘肅州所有防城護運兵勇馬步各營皆取給於此算至見新時縱有存餘必無多矣若復加價訂買則已訂之五萬餘石更難收齊且貧戶無糧出糶者買食維艱青黃不接時無從設措上年於散給籽種外郡縣復廣設粥廠煮賑療飢洵非得已價愈增則富者之欲未厭而貧者之苦愈甚揆之事理實不可行且新糧訂買已多民間搜括殆遍本屬實在情形袁保恒所奏以南路調運爲末著自有所見古濟之糧旣已採過涼甘肅之糧又難議增然則台移巴里坤其必仍於北路廣籌採運也明矣烏里雅蘇台科布多一帶糧多可採袁保恒自當盡心籌之近又廣加諮訪知歸化包頭至射台大巴一帶十數站大巴至巴里坤十六站中間產糧之處甚多其地雖無台站無一定地名然舊時商旅之赴巴古烏魯木齊者每取道於此以其有糧可購有駝可僱價均平減也湖茶私販由此路至古城銷售經歷任督臣奏明有案近日臣礮隊總兵鄧增隨金順到巴里坤稟稱巴城商賈絡

繹不絕棉價布價糧價與內地相近皆言由烏科一帶來者卽指此路觀其市價平減知其路徑之捷價脚之省景廉前與金順書稱包頭運糧實亦不少非虛語也臣檄歸綏道崇繕詢訪確實具報一面委員攜銀二萬兩往歸化包頭試辦採買應否加銀增採容遲再議惟袁保恒所奏移台巴城雖以調運烏科之糧爲言以調運南路爲末著而注意仍在肅州現在趕製大車以購車騾三千頭駸駸西向其勢已成事難中止姑無論天山嶺脊石徑犖确向無轍迹重載糧車聯幫銜接較之單車空車尙可參用人力從容過險者艱阻特甚事必不行也卽照袁保恒所擬辦法言之車糧由肅運巴艱阻所不辭勞費所不惜而肅運之糧亦無顆粒可到巴城按肅州安西越哈密二十四站計程雖止二千二百餘里而道路綿長又多戈壁車駝馱隻均須就水草柴薪之便憩息牧飲不能按站而行中間人畜疲乏又須停住養息卽催趨迫促斷非三十餘日不能到巴計每騾一頭日須噉料八觔一車一夫口

食日須兩觔蘭州以西料豆缺產喂養用青稞大麥粟穀等充之
畜食之料卽人食之料也車行三十餘日計一車運載之糧至多
不過六百觔兩騾喂養卽耗去五百數十觔車夫口食亦須六七
十觔而車糧亦罄安有餘糧達巴里坤乎卽達巴里坤而車騾之
喂養車夫之口食又將安出此不謂之虛糜不得也大抵西北轉
運以駝隻爲宜爲其食少運重又能過險也駝行口內食糧不過
三觔晝牧夜行可省草束且一夫管轄五駝日需口食又省若行
口外則食草不食料如遇勞乏但喂養一升加鹽少許仍卽復故
惟駝夫宜擇其老實勤快管夫之人宜擇其耐勞善於體恤者雖
不歇廠亦少倒斃之患故關內外諸軍均使駝而不使車統領營
官之能者常留心照料不盡委之厮養小卒也袁保恒初議移台
臣卽詳告以宜駝不宜車關內之用馱騾可多車騾宜少天山無
車路關內之糧難逾天山及購駝不如僱駝辦官車不如用民車
已辦之車只可酌改州縣之台車以省喂養而迄不見察臣無如

何現在製造車輛已成採買騾驢已到而始籌及喂養維艱意欲
仍駐肅州辦理東運並奏陳西路用兵糧台均設肅州而引岳鍾
琪曾用兵車糧車黃廷桂分車駝北過天山爲證不知岳鍾琪之
用兵車後此曾否停止其過天山或係令士卒下車推挽以資輕
便均無從詳考至糧車則岳鍾琪於後起運至玉門布囊吉時咨
止前進而由巴里坤派餘丁三千幫協轉運謂可省車馱之煩並
以節費當時原有紀錄黃廷桂於用兵回部時以車馱駐哈密一
半赴北路巴里坤裝糧運庫車一半徑由哈密運南路吐魯番時
當重熙累洽物產豐盈而岳鍾琪由南路進兵巴里坤始用糧車
繼復停止至派餘丁三千轉運藉以省煩節費其因天山非車路
可知黃廷桂用車騾一半往北路裝糧運庫車重載返時不逾天
山其一半徑由哈密運吐魯番則本是向天山西南行更不近天
山也袁保恒預存想當然之見求成必不行之事竟至牽強往迹
傳會其說用實有所未喻也竊維從前西路用兵

列聖之派大員赴肅州哈密辦糧台轉運前敵軍食者均以集協餉調車馱駝隻爲事至糧料草束一切承辦之員必視前敵軍行所至擇路之捷費之省者妥慎籌維務得其當道光六年討張格爾官軍由北路向南路之阿克蘇

宣宗特頒手諭十條

聖懷以肅州嘉峪關距阿克蘇五千餘里哈密總設糧台鞭長莫及

飭運烏魯木齊所積屯糧赴阿克蘇並於伊犁採買省內地轉輸大半又以內地軍械火藥由南路吐魯番至庫車途多戈壁

飭改由北路逾冰嶺轉阿克蘇程途相等細繹

疊降諭旨於師行南路時猶以運北路之糧省關內轉輸爲宜然則師行北路不應由南路辦運也明矣臣愚謹就現在已成局勢

言之袁保恒移台之先必將烏科及各處糧路運路周爰諮詢精心擇度以所購之駝運北路之糧以次達巴里坤迨巴里坤收有

成數袁保恒徑赴巴城設立糧台一面仍運北路之糧一面用駝南來裝運南路肅局之糧屆時距秋穫之期不遠採糧較易可冀集事較之駐肅轉運巴里坤重車不能過險軍餉無可繳納勞費過鉅終歸無濟者大不侔也其已辦車騾虛耗喂養殊爲可惜擬以有騾無車者分撥蘭州東路抵臺車之用或加撥涼甘安肅各處備臺車添套及補里車放忙之缺容與袁保恒商定再由袁保恒自行陳奏至關外諸軍需用軍裝軍火向係自行製購入陝後由西征糧台駐陝軍需局發傳牌到蘭州由督署發傳牌飭沿途州縣隨時派台車民車運送價由各軍押運委員自發相安已久從無違誤查諸軍軍裝軍火所習所用各有攸宜色目既殊多寡之數緩急之需亦異毋庸由糧台備爲備辦其子藥等項臣已設局肅城各統領遇有缺乏均可隨時借領將來另款開報爲數無多自無須添設款目袁保恒原奏糧台移設須撥兵護運請於舊部商調數營奉

諭左宗棠能否將應撤之營酌撥馬步若干著酌定情形與袁保恒會商妥辦竊維臣軍於上年撤遣馬步四十營後又撤去奇捷等營馬步勇夫約共千名現僅存一百四十一營須俟洋款借到再酌其應撤之營久役思歸是否願赴關外無從懸擬查巴里坤原有領隊大臣及勇兵駐紮臣近因鎮標急須整理奏委記名提督王鳳鳴署理鎮篆已飭隨帶餉銀六千兩先赴署任切實汰淘募補酌給月餉冀可改觀臺移同城自可資其照料糧臺所應有者護臺兵勇夫役爲數不必過多設臺以後前敵諸軍餉需一切均可赴糧台請領毋須由臺運解毋須弁兵押護哈密現有張曜全軍駐紮安西肅州甘州涼州蘭州平涼以至陝西節節駐有防營原因巡緝遊匪兼護運而設袁保恒隨時咨行護運斷無違誤毋庸調撥馬步致涉虛糜移設糧台原爲接濟前敵各軍起見糧台專司轉運不必參預軍務且現在台尙未移籌糧籌運茫無頭緒豈可預議增調馬步各營益重其累臣拜摺後當卽鈔錄摺稿

咨知袁保恒如有不合彼此無妨辨駁以衷一是俟議論悉合意見均融當再會銜具

奏所有移台轉運事宜及現在確實情形謹一併詳細陳明伏乞

聖鑒訓示施行

光緒元年二月初三日

附景廉摺

竊奴才十二月初三承准軍機大臣字寄奉

上諭左宗棠奏辦理出關諸軍餉數及糧運情形等因欽此奴才前

因哈密巴里坤古城濟木薩等處皆係兵燹之餘戶口凋敝土地半皆荒蕪古濟招集流民數僅百戶產糧不敷需用官屯牛具缺乏播種無幾一切艱窘情形久在

聖明洞鑒之中是以奴才屢次

奏請倣照成案由甘涼一帶運糧並於關外安設糧臺次第接濟

金順各營且為張曜宋慶兩軍續進之地茲左宗棠奏稱奴才已為

金順訂買糧二萬餘石足供金順全軍數月之食擬請將關內運

糧停止等語奴才不勝駭異悚惶伏思奴才渥受

聖恩膺茲重寄凡有奏報俱係實在情形不敢稍涉欺飾如果古濟一帶糧石易於採買且又爲金順訂買如此之多奴才具有天良何敢不隨時

奏明而仍以關內運糧屢瀆

宸聽查金順委員在古城曾經自行採買糧七千餘石已收入倉者僅四千餘石其餘催收尙覺喫力奴才並無代訂糧石之事緣古濟戶民只有此數產糧亦只此數以二萬餘石之糧豈能咄嗟立辦况該處買糧皆係現銀奴才軍餉十分支絀自顧軍食尙且不暇該糧二萬餘石需銀十萬餘兩一時何能有此鉅款嗣查左宗棠原奏稱係額爾慶額桂錫楨等稟報無論所稟代訂糧石一事失實卽所稱糧價亦與奴才數年以來買糧價值不符當卽咨詢額爾慶額旋據覆稱本副都統查詢總兵桂錫楨所遞左大臣原稟內稱所買糧二萬餘石係詢問各糧台委員及地方官所言由巴里

坤西至江土板灘等處統計非指古濟而言並無已爲金順訂買糧二萬餘石之語副都統曾准左大臣咨詢糧料情形卽以桂錫植所查各情約畧復之並謂口外今年收成歉薄不及去秋豐稔每石小麥計重三百餘觔定價四兩三錢如趁秋麥登場得有現銀極力搜買又須交納齊全或可稍供軍食若料豆則顆粒維艱雖有現銀無處購買亦無爲金順訂定二萬餘石之語等因並據桂錫植鈔錄原稟呈送前來奴才檢閱桂錫植原稟皆係約略揣度之詞毫無實據且係合巴里坤沙山等處而言又將該軍食用過糧石核算在內其不足憑信已可概見額爾慶額來咨所稱該副都統及桂錫植均無呈報奴才爲金順訂買二萬餘石之語詞意含混是否失實殊難揣測第思左宗棠爲

朝廷大臣既經具疏入

告必非無因特恐該副都統等冒昧具報此時意存掩飾事未可知奴才已調取該副都統咨覆左宗棠原稿俟咨送到日再爲行查

左宗棠以昭核實至古濟地方情形均係共見共聞伏懇

聖明俯賜查訪如奴才有爲金順訂買糧二萬餘石之事請卽治奴才

以欺罔之罪又左宗棠原奏內稱烏科採買糧石運至古城一石

計重三百餘觔較由涼州運安西計重百觔之腳價已少三分之

二况由安西逾哈密每擔又加運腳過倍等語奴才伏查烏里雅蘇

台乃不毛之地素不產糧該處換防官兵口食皆由歸化運解科

城地方尙能種植青稞然僅敷該城換防官兵二三百人口食之

需去歲該城添練民兵曾兩次借過奴才軍營轉運糧一千石此卽

無糧之明證豈復有餘糧轉解古城奴才前

奏原由口北歸綏兩道在關內採運非由烏科兩城採買嗣因道

路遙遠無長駝運送軍台駝隻不敷應用積壓一年有餘運送到

營者僅十分之一兼之轉運軍火差役往返絡繹不絕不免擾累

蒙古無以仰體

皇上撫綏外藩之意是以於奉

旨飭查後卽

奏明停止請由甘肅運解該督謂由烏科兩城採買是於此事尙未深悉顛末也刻下金順所部駐紮巴里坤只購買糧三千餘石辦理甚爲棘手並聞該城糧價長至十餘兩猶無處糴買街市間有餓殍古濟雖較巴城稍優而新復之區汙萊甫闢以數百戶之流民種植產糧能有幾何近來大軍漸集商賈接踵而至食衆生寡其涸可待况歲時豐歉不能逆料邊塞沙磧之地四無鄰封一經匱乏呼籲無門設士卒因飢譁潰其害何可勝言至於屯田以濟軍食自係行軍要訣奈征兵與防兵不同用力不能專一牛具又難猝辦奴才昨接金順來函據稱現在赴北路採辦牛隻並稱該軍善於農事者甚少請由奴才處借給熟悉種田之人以資教習等語宋慶雖派員在哈密五堡地方墾種屯田明歲收成亦難預定是欲積屯田以贍軍食非二三年不能奏功實屬緩不濟急總之師行糧食最爲急務而尤以寬爲籌畫預爲規畫內地且然無論

塞外金順所部駐紮於肅州安西者尚有十餘營若不全赴前敵將來進取烏垣兵力斷不敷用且以有用之兵置之後路無用之地亦殊可惜而巴里坤古濟情形如此艱窘勢又不能遽集焦灼徒深奴才愚昧之見總期聚精會神一鼓作氣滅此朝食庶可仰副高厚故通盤籌畫請由關內運糧接濟以免老師糜餉日久無功若謀同築舍月羈歲淹使釜魚阱獸久稽

天討奴才身罹重譴固不足惜將何以恢疆域而警外夷至張曜宋

慶兩軍口糧等項已奉

旨由左宗棠辦理該軍出關後自尙無虞枵腹第該督前次奏稱軍糧只能運送哈密是該軍亦只能駐紮哈密一踰天山卽無糧運矧西至古城又千餘里查張曜宋慶兩軍既奉

旨出關征剿或北至古城與奴才合兵進取或由南路進攻吐魯番

斷無久駐哈密之理若糧運只及哈密則該軍勢不能前進株守

後路又何用此重兵虛糜餉項爲哉奴才與左宗棠金順同膺重寄

理宜和衷共濟仰舒

皇上西顧之憂斷不敢固執己見自蹈愆尤第奴才既仰承

簡命督辦新疆軍務自應統籌全局以期無誤戎機故不得不直

陳於

聖主之前合無仰懇

皇上乾綱獨斷仍飭左宗棠將後路糧運台站查照成案妥爲籌畫不得意存諉謝奴才仍隨時體察情形如果二三年內屯田採買日有起色足資軍食卽當

奏明停止轉運以節經費而舒民力除由奴才再行函致左宗棠金

順妥爲籌商外所有接奉寄

諭覆奏緣由理合由台六百里馳陳伏乞

聖覽訓示施行奴才無任激切屏營之至

光緒元年正月二十五日

宋史卷一百一十五

...

...

...

...

...

...

...

...

...

...

...

新疆圖志卷九十三

奏議三 國朝 左宗棠二

遵 旨督辦新疆軍務敬陳籌畫情形摺

請 簡派大員幫辦陝甘軍務摺

軍餉支絀請速籌解濟摺

關外新疆軍餉請仍歸戶部核撥摺

請各省勻濟餉需片

請飭兩江迅解老湘全軍月餉片

請飭福建迅籌欠餉片

請飭劉典迅速赴甘摺

楊昌濬可資臂助片

暫借洋商巨款以資接濟摺

遵 旨督辦新疆軍務敬陳籌畫情形摺

竊 臣 於四月初八日承准軍機大臣字寄光緒元年三月二十八

日奉

上諭本日已有旨令左宗棠以欽差大臣督辦新疆軍務金順調補烏魯木齊都統仍幫辦軍務景廉調補正白旗漢軍都統回京供職景廉著俟金順行抵古城後將各營兵勇糧餉移金順接管再行起程回京新疆軍務孔殷必須速籌進兵節節掃蕩金順本有自帶各營益以景廉所部兵力已不單薄著卽督率各營親臨前敵相機進剿爲收復烏魯木齊計所有進兵機宜隨時會商左宗棠酌辦袁保恒已令回京供職西征糧台已諭左宗棠責成陝西藩司經理應行奏催及咨行各省事件呈由陝西巡撫覈辦關外轉運事宜卽在哈密巴里坤各處設立糧餉分局由左宗棠派員經管袁保恒將經手事件逐一交代清楚後起程回京見在關外兵事餉事并轉運事宜均歸左宗棠督辦蘭州相距寫遠鞭長莫及該大臣當統籌全局酌核辦理關外軍食務當源源運濟以期士飽馬騰毋令停軍待哺宋慶一軍該大臣已咨令回紮潼關

本日亦諭知錢鼎銘商令該提督擇要駐紮矣等因欽此跪聆之下悚惕實深竊維新疆之事從前因兵力餉事未能兼顧遂至叛回構變強敵窺邊土宇人民不可覆按於此而欲力圖恢復挈二萬里戎索之舊還之職方戢萬千族殊俗之民漸以聲教正值寰區甫靖財力久殫內患雖平民勞未艾其難誠有倍於拓疆之始者微臣庸朽菲才又值衰疾侵尋志慮鈍竭何敢不自忖量謬以自承顧念臣子之義厥重匪躬疆場攸司責無他諉自從戎伊始卽矢盡瘁馳驅豈頭白臨邊忽易初志謹將所籌情形爲我

皇上敬陳之一曰廣籌軍糧也師行北路宜用北路之糧不但節費亦免耗糧臣前疏已詳之南路肅局既有見糧又車馱駝隻購僱稍多可以灌運自宜嚴切督催以廣儲峙北局設於歸化分局設於包頭飭升用知府前署綏德直隸州知州陳瑞芝提督銜總兵蕭兆元司之僱民駝轉運計自三月至五月據報陸續運過四十餘萬觔至巴里坤每百觔牽合銀八兩內外袁保恒前奏甯夏

採運

臣

飭署甯夏鎮總兵記名提督譚拔萃甯夏府知府李宗賓

接辦見據報已雇駝數百先由察罕廟試行如果此路通利再爲

加辦察看漠北素產健駝又便水草惜久未開運倉卒應募者少

又駝戶每以拉差爲苦疑沮不前

臣

見飭巴里坤鎮鎮迪道嚴行

示禁冀聞風踵至運道暢行庶餉饋可通亦收節省之益正辦理

間適俄國游歷官索思福諾斯齊等到蘭與之談論近事索思諾

福斯齊自稱俄國在山諾爾地方產糧甚多駝隻亦健距中國古

城地方不遠如中國需用糧食伊可代辦送至古城交收由俄起

運須護運兵弁均由在山諾爾派擬其兵費一併攤入糧腳價內

每百觔需銀七兩五錢如年豐糧多駝脚不貴則價尙可減也比

卽與定議書立合約計年內可運古城糧二百萬觔明年夏可運

足三百萬觔索思諾福斯齊已專兵八瓦勞伏前往告知其地巡

撫據稱斷不致悞

臣

見委知府銜甘肅候補同知丁鶚等赴巴里

坤又委布政使銜甘肅卽補道陶兆熊等赴古城辦理採糧開墾

及收支事宜此北路籌糧情形也南路肅局存見糧三萬餘石安西局存見糧一百數十萬觔哈密局除張曜各營外存見糧一百三十萬觔見正趕緊灌運張曜在哈密辦屯墾水利事必躬親不惜勞瘁據報墾荒地一萬九千餘畝可獲糧數千石見據甘涼肅各廳州縣稟報今歲夏雨優渥冀獲豐稔將來新疆市價有減無增車駝之受僱者亦日多一日轉運較從前稍易此南路籌糧情形也臣因歸化包頭採運巴里坤較涼甘肅採運巴里坤腳價大減而糧則實裝實卸別無虛耗故決計於北路開一運道陸續撥兌實銀已四十餘萬兩甯夏已發銀三萬兩計秋高駝集運數可增南路由甘運肅由肅運安西均用車馱由安西運哈密運巴里坤均用駝隻節設廠局溶水泉刈草薪以利運道一切經費統於現辦採運項下開支計輾轉般運數可倍此合南北兩路運籌巴里坤之糧也俄國在山諾爾地方緊接我布倫托海邊界距古城數百里俄人代爲採運二百萬觔送古城路程較近實屬獲之

意外計需銀十五萬兩此於北路之北籌古城之糧也就目前局勢籌應前敵急需事之所得爲者祇此歷代之論邊防莫不以開屯爲首務或辦之用兵之時以省轉饋或辦之事定之後以規久遠要之得人則有益軍儲不得其人則虛糜經費且西北治地開荒尤資水利就窪瀦水障之令深引渠灌田灑之令普既需人工尤資器具而哈密土質善滲土工石工外別有毛毡包裹之工爲他處所罕既須多籌器具又需廣備毡條開墾之先所費既巨臣於張曜由安西進屯哈密時已津貼過運脚等銀五萬餘兩購辦毡條價脚銀約九萬一千餘兩張曜躬率所部殫力經營而後得著成效計以後踵而行之因此奧區保綏戎藩而成數十百年無窮之利見復經畫巴里坤收召饑兵一千三百餘名每月給餉銀三千兩配以矛桿鎗礮子藥俾其復成勁旅復委甘肅同知丁鶚等勦辦屯墾事務兼收包歸甯夏所解軍糧惟巴里坤地當天山頂畔氣候凝寒舊設天時地利人和等廠久已荒廢屯務雖興暫

尙難供客軍坐食也由巴城而西北七站地勢沃衍天氣漸和由此而古城迤西一帶更稱膏腴上壤景廉所辦公屯私屯外餘荒甚多若民兵盡力耕墾不虞乏食臣見委布政使銜甘肅補用道陶兆熊揀帶員弁前赴古城驗收俄人代辦軍糧支發價脚一面察看古城一帶情形經畫屯墾事宜隨時馳稟核奪此籌哈密巴里坤古城糧運屯墾情形也一日兵事宜早爲整理也西事稽延至今未睹成效由於冗食多而戰士少耳旗綠諸營久不足額就近各省無勁兵應調於是取土著兵民及各處就食兵民授地耕墾一備軍食一備戰守無事則驅其盡力隴畝有事則調其效命鋒鏑謂之且耕且戰事非不勞謂之卽兵卽農名非不美然調赴期會則彼此觀望數日不能取齊麾令前驅則勇怯雜糅氣勢不能完整其何以戰且旣挂名武籍又令其從事耕耘譬猶左手畫圓右手畫方兩者相兼必致一無所就是且戰之兵不能戰且耕之兵不暇耕也茲宜劃兵農爲二擇其精壯有膽之兵宜馬者馬

宜步者步束以營制一如內地軍營其曾著戰績如徐學功輩用之爲管帶爲督帶其才能辦事如孔才輩用之爲幫辦凡督帶管帶以及所部哨官什長酌給薪水辦公銀兩散人給餉與糧按照客軍營制減給其愿弱不任戰者散之爲農按照戶口指餘荒地畝令其承墾由官酌給籽種豐器耕牛收獲後繳本歸倉外不取息其所獲糧石由官照時價收買庶簡其精壯營伍可得而實散其愿弱屯墾可得而增兩利之道也關外各城所駐大臣有辦事領隊幫辦之分所駐之兵有錫伯索倫達呼爾察哈爾蒙古厄魯特沙畢納爾及綠營攜眷兵換防番戍兵之分亂後舊制不可復按而辦事幫辦領隊大臣於本營存兵外兼帶馬步各營各請專餉所稱馬隊步隊旣罕能戰之兵而辦事幫辦領隊各員又非盡知兵之選徒糜餉糧無濟實用都統及各大臣因慮產餉未極其豐增竈更形其絀力主畫地自封閉關謝客之議以護官私屯糧不顧兵事利鈍金順進駐古城張曜進屯哈密遲回不前而後隊

尙迪遵原防者以此見在巴里坤古城已辦採運哈密已開營屯
金順張曜兩軍留後之隊應卽陸續開拔兵力旣增則屯丁可減
竊維此時必分別兵農責兵以戰課農以耕而後餉事可節兵事
可精也哈密巴里坤古城所駐各大臣就現在所存旗兵核定糧
餉如缺額過多准照舊額馬步就地挑募丁壯補數但責其保守
城隘不必責以戰事脫屯丁伍籍散之歸農則盡力隴畝民樂耕
其野而官屯私屯地畝收獲餘糧准照時價發糶民益得其饒不
但分駐各軍可資接濟卽調發續進馬步沿途就地採購毋期裹
糧以趨於兵事更覺順利較之見在辦法兵農兩荒不猶愈乎如
蒙

聖明鑒允應請

飭下金順文麟遵照辦理庶於時局有裨此籌整理哈密巴里坤
古城兵事實在情形也

諭旨關外兵事餉事並轉運事宜均責臣督辦而蘭州距前敵數

千里餉糧轉運雖可總其成至忝預戎機則調度指麾不能發當其可自當簡率大軍親駐肅州相機辦理惟師行糧隨事豫則立當此新穀未升駝隻歇廠轉運難期暢旺之時不先將前敵各軍食糧灌運充裕催其留後各營陸續開行而遽大軍進發致占前敵軍食向後彼此兼顧更費周章督臣兼司關隴轄境遼濶移節肅州距關內腹地太遠又苦鞭長莫及調集各軍所遺營壘均是扼要地方非權其緩急移撥填紮於建威銷萌之計亦形疏略見在一面督飭西路各局於駝隻起廠之前趕催車駝層遞灌運一至八月卽調新駝分駐安西哈密各處分段層遞轉輸而調回車駝搬運新糧一灌運安西糧局一運供臣部軍食庶期會從容畜力舒展於事均便一面調集各路將領商議出關隨征留後防守各事宜及移營分紮一切務臻周妥臣之進肅州未能求速者此也至景廉所奏關內運糧至古城應以十萬石爲度以勛重則三千餘萬勛非竭四五年之力不能辦到金順絨開所有會銜絨牘

全未與聞所需軍糧合留後十餘營并計每年以市斗二萬石爲度尙只六百萬觔然此皆金順未調補烏魯木齊都統以前就彼時局勢言之也合併聲明所有籌辦糧運兵事謹據實陳奏伏乞

聖鑒訓示施行

光緒元年六月二十八日

請 簡派大員幫辦陝甘軍務摺

竊臣自蒙

恩調陝甘總督時已苦衰病侵尋於委頓之餘強自克勵支持至今又已八載當茲邊陲有事之秋非臣言病之日茲復承

恩命督辦新疆軍務負荷更重彌切悚惶初擬本任事繁責重應籲懇

天恩別簡實任人員以資鎮撫又慮嗣事之人或因未悉底蘊或因意見參差致多抵牾臣茲出塞遠征兵事必以關隴爲根本一有間隔則局勢立行滯礙貽誤戎機而所事又未能預計歲月師

行又未能預計遠近若非慎圖於始何能壹意馳驅無憂後顧此私懷所不能釋然者也臣所部將士雖兼收并採不專一省一路之人而自咸豐十年從戎以來藉故鄉子弟之力至今揀閱伍籍湖湘之產居多使嗣事之人非所素習則留後各軍營未能適然無疑指揮或難得力甘肅雖大局已定四境晏然回番善詐多疑本其常態非善爲撫馭亦恐措置失當事變旋生所以不敢遽請簡放實任者以此伏見前署陝西撫臣三品卿銜二品頂戴劉典於臣在籍練軍時卽總理臣軍營務厥後轉戰江皖浙閩廣東幫辦陝甘軍務獨當一面之日恒多其署陝西巡撫肅清全省功績昭彰所定陝西里差章程輿情翕然猶存遺愛嗣因母老多病告養乞歸蒙

恩開其署缺劉典惑

矜全之恩山居五年晨夕侍養然心念隴事艱難微臣衰老多病歲時書問於軍事外代籌調攝之宜每遇假歸將士詳詢近事欣戚

同之近聞臣夙恙未愈新增咯血轉筋健忘之證時爲流涕聞其
母蕭氏幸健如常尙有三子侍養在籍劉典暫離子舍似非不可
伏懇

天恩飭令劉典速赴蘭州幫辦陝甘軍務本熟路而駕輕車外可
孚民望內足協軍情於時局必有裨益而臣獲同心之助兵餉兩
事無虞掣肘免致分心俾得畢其愚忱用之前敵則尤幸甚也劉
典本係親老告養人員羈以職守非其心之所安惟該員前以三
品卿銜二品頂戴著陝西巡撫本無底缺可否仰懇

天恩以三品京卿候補幫辦陝甘軍務之處出自

聖裁此外尙有二品頂戴開復山西臬司陳湜一員本有用之才
於甘肅地方軍務情形尤爲熟悉前以修墓告假回籍尙未來蘭
臣已緘催迅速前來謹一併聲明伏乞

聖鑒訓示施行

軍機大臣字寄光緒元年七月初九日奉

上諭左宗棠奏籌畫新疆軍務情形一摺新疆地方從前因兵力
餉事未能兼顧以致久稽規復見在關內肅清正宜乘此事機力
圖大舉綏靖邊疆左宗棠此次所陳籌辦糧運兵事有條不紊頗
合機宜南北路分籌採運著該大臣督飭委員等妥爲經理俄官
索思諾福斯齊到甘左宗棠與之商定由該國購糧運赴古城於
軍食亦有裨益開屯爲邊防要務全在得人而理據奏張曜進屯
哈密親率所部殫力經營已著成效該提督現未移軍務當實力
興辦以規久遠巴里坤古城一帶開墾事宜左宗棠見派員前往
察看並著該大臣悉心經畫次第舉行西路各營兵勇不宜耕戰
相兼該大臣所奏擇其精壯者束以營制如徐學功輩分別任用
其不能戰者散之爲農卽著左宗棠金順會商妥辦以實營伍而
增屯墾金順張曜兩軍留後之隊卽當開拔前進兵力既增則屯
丁可減據稱哈密巴里坤古城所駐各大臣應就見在所存旗營
核定糧餉如缺額過多准照舊額馬步就近挑募丁壯補數但責

其保守城池不必責以戰事脫屯丁伍籍散之歸農官屯私屯地畝收獲餘准照時價發糶各軍可資接濟兵事更覺順利等語著金順文麟卽照該大臣所籌辦理左宗棠擬俟前敵軍糧灌運充裕甘省防守各事布置周妥卽簡率大軍進紮肅州該大臣當安速區畫俾出關各軍整飾西進迅奏膚功朝廷有厚望焉左宗棠所奏請派大員幫辦等語已明降諭旨將劉典以三品京堂候補幫辦陝甘軍務並諭王文韶催令劉典陳湜迅赴該大臣軍營矣將此由六百里諭知左宗棠金順文麟並傳諭張曜知之欽此

軍餉支絀請速籌解濟摺

竊維^臣軍餉項專恃各省協濟而協濟之欸尤以添撥釐金爲大宗查本年收欸截至六月據西征糧臺月報各處文報約收各關協餉一百四十餘萬兩內除袁保恒奏撥出關糧運的餉暨抵解部撥款內劃收過銀五十四萬兩由袁保恒另案報銷外^臣軍實收協餉銀八十餘萬兩上年籌借洋欸三百萬兩分四批提解除

陸續劃還上冬今春滬鄂陝省先後籌借商款本利銀一百二十餘萬兩外實收銀一百七十數萬兩又收袁保恒移交糧台現銀三十三萬數千兩收歸綏烏城剩存購駝銀十九萬餘兩共收實銀三百餘萬兩此六月底以前餉項入款實數也至軍餉出款以鹽菜乾銀爲大宗近因籌辦關外軍糧南北數路轉運騰挪巨款儘先兌撥半年以來通計出款已一百三十餘萬兩幾占入款之半此外遣撤裁併陝西固原提臣所部及臣軍宗岳營務果字等營與零星裁併改兵約撤馬步勇丁長夫三千餘名共發過實餉二十五萬餘兩哈密及肅鎮各營屬州縣屯墾水利經費銀約十四萬餘兩墊發文麟明春軍餉糧價銀一萬四千六百餘兩現因籌備出塞之師除留防各營外又陸續增挑馬步十餘營合共百三十餘營遣赴前敵者需酌給足餉分防各路者需照舊發給鹽菜糧價馬乾公費與夫軍裝軍火車駝什物採製之費關外台站整頓修復之費及州縣津貼一切雜支由臣隨時核實通融酌濟

共支發實銀一百三十餘萬臣前擬洋款借到後將東南各路防營再加裁併減汰軍裝軍火津貼轉運諸費可減者均擬酌量核刪省內地經費勻濟關外乃粵海關票抵借之百萬兩前因部文有能否減借省息之商往返咨查羈延累月不獲大批逕解而奉旨督辦新疆軍務所需軍裝軍火等項不但不能省節並須從新增廣製辦以故應需各款未能及時清理卽如穆圖善所部本擬全撤而終以餉項無出僅擬先撤四營有零尙未定也臣遵旨督辦新疆軍務自宜合關內外全局統籌就此情形而言微獨西路北路邊防及撫回各處防軍未可輕議裁減卽已經減撤者一經另有調派或地方緊要應酌量抽撥添募填紮或應撤勇添兵以期周妥內地存留各營既不能再擬裁減而檄調出塞馬步各營歲役遲速未可逆計應切實整理調集各隊勤加演習以期精而又精收寡可敵衆實效各該營所需添買驛駝馬匹皮棉衣褲鑼鍋皮碗口袋等物應預備棚幟旗帳號褂應更換軍械火器

火藥應增籌軍行糧餉軍需各項轉運採製津貼各項應寬爲籌備餉需較前有增無減者勢也軍行糧隨須趁新糧登場駝隻起廠多撥經費分飭加緊籌採籌運方免臨時周章現除北路歸包總分各局撥款稍多可從緩撥解此外甯夏一路據該局員稟報由定遠營取道察罕廟經喀爾喀邊境之巴尙圖素廟與歸包糧駝會合徑趨巴里坤較歸化起運約近數站業於七月初一日試運頭批臣已飭儘多添顧趕運惟試運伊始大信未孚商情不無疑沮亟應加撥現銀俾應得腳價按批清給一面由臣頒發告示嚴禁巴里坤各軍拉差之弊庶可期其踴躍其北路之北古城巴里坤採運屯墾均應添解大批至南路關內採運除涼州勞費太重現擬停辦外其甘肅各廳縣已據該管道員議詳共定採市斗夏秋糧十二萬二千石飭遵照上年舊章頒發期票搭發稍資騰挪而商民車駝腳價按斤按里計算運糧多則腳銀之多因之而增約略計算南路關內採運每月非得現銀二十萬兩不敷

支發此現籌新疆南北各路糧運價脚應出之款也此外出款則仍以現存馬步各路土勇營兵正餉與夫軍需採製轉運脚費薪糧津貼各款爲大宗。前於本年三月間據實陳奏每年共需實餉六百數十萬兩外增出關採運出款二百餘萬兩以每年實到協餉五百萬兩劃抵出款八百餘萬已不敷實銀三百餘萬兩今則新疆兵餉糧運各事宜一切責臣督辦局勢更寬就現辦情形言之非獨糧運一事斷非上屆二百餘萬兩實銀所能敷衍卽見存馬步軍需正餉仍非六百數十萬兩不能支持其裁併後積欠勇夫七百餘萬兩正餉之數又欠未發卹賞銀三十餘萬兩均須陸續發給實銀不能空言抵塞今年春夏協餉所入不及百萬兩所以能勉強勻劑者全賴奏借洋餉鉅款三四等月提銀以後所有蘇浙粵三省協餉每年連息共應劃解銀一百二十三萬餘兩清還借項是常年協餉入款近五百萬兩內又短去銀一百二十二萬兩矣出入兩抵前奏每年不敷銀三百餘萬兩者今實不敷

銀四百數十萬兩此通籌餉項入出兩抵不敷之實在數目也奏借洋餉隨到隨罄應解協餉盼切成空部撥景廉庫欸三十萬兩改解臣軍已咨照陝撫臣派員赴部請領而金順已絀牘頻催并屬先行挪款墊解將來斷難藉此爲通融周轉之資此外後路報解協餉僅只十數萬待撥之款陳欠相因源涸流窮時深廩廩如果各省關積欠甘餉能如上年臣議移台經費奏案提解積欠之半應解協餉仍按月如數籌撥其部撥出關糧運的餉百二十萬兩又各省關抵解部庫銀八十萬兩除袁保恒經收銀五十四萬兩外短解銀四十六萬兩均能儘先籌解俾清界限而應急需庶各路開辦採運不至停運待銀調派出關諸軍不至停兵待餉乘現在南北各路開辦糧運漸有成效應調各軍檄令簡練整理漸有頭緒之時臣於協款解到時通融挹注尙可詳爲布置以赴戎機否則現辦諸事無項支銷待發諸軍無款散給而前進局勢難言矣鹽菜乾銀年終滿餉及准假勇夫不能照舊發給而後路局

勢難言矣迨事機已誤而後議補救之策所費益多求如目前局勢亦恐難得此尤微臣所日夜焦思而罔知收措合無仰懇

天恩俯念邊塞軍務緊要餉源枯竭待用方殷

勅下戶部各省疆臣速將部撥出關糧運專款內短解銀一百四十餘萬兩依限提解所有積欠甘餉二千六百一十餘萬兩分省分限指提若干應解協餉仍按月如數提解毋再延欠俾速戎機毋任惶悚待命之至伏乞

聖鑒訓示施行

光緒元年八月二十五日

軍機大臣奉

旨戶部速議具奏欽此

光緒元年十月初四日准戶部咨開本部遵

旨速議陝甘總督左

奏軍餉支絀請速籌解濟一摺應請

飭下各直隸省督撫將軍卽行查明上年由部提撥各款欠解若

新編國志
千勒限一箇月內掃數清解福建省欠解西征協餉三百餘萬兩
應卽遵

旨趕緊如數籌解其餘各省欠解西征協餉統限於一年內先行
各提解一半應用其餘一半欠解之餉仍隨每月應解協餉陸續
分解至各省關按月應解協餉自本年爲始月清月款不准絲毫
再有蒂欠俾該督得以迅赴戎機免致貽誤等因具奏奉

旨依議欽此

關外新疆軍餉請仍歸戶部核撥摺

同治十三年十一月初五日准軍機大臣字寄十月二十一日奉
上諭戶部奏出關各軍餉項暨新疆各城軍餉請統歸西征糧台
經理一摺現在大軍出關相機進取前降旨派左宗棠督辦糧餉
轉運一切事宜并令袁保恒幫辦所有出關各軍應需糧餉運費
等項自應統歸左宗棠袁保恒斟酌緩急奏請籌撥至新疆軍餉
近年各城請撥頭緒紛繁殊不足以昭核實亦應由左宗棠等一

併經理嗣後出關各軍暨新疆各城請撥餉需均由該統兵各員及各城大臣咨照左宗棠袁保恒核明數目酌量奏撥不得紛紛自行奏請以歸畫一而專責成卽著左宗棠袁保恒景廉金順咨照該統兵各員及大臣一體遵照辦理左宗棠袁保恒務當通盤規畫酌盈劑虛核實籌撥毋任稍有匱乏原摺均著鈔給閱看欽此_臣比恭錄咨照袁保恒由糧台咨行遵辦嗣於本年二月准戶部咨送同治十一二三年奏撥新疆軍餉案由五六等月各城將軍都統大臣查開餉數源委先後咨報到臣比經逐股稽核誠如

諭旨頭緒紛繁殊不足以昭核實_臣忝督辦之任所有出關各軍新疆各城餉需責_臣一併經理藉非格於勢限於地曷敢稍惜心力不卽綜核奏撥所以然者統兵出關大員如金順明春張曜暨景廉移交各軍各有專餉內除張曜嵩武一軍餉需向由河南撫_臣解濟不歸西征糧台經理外其餘金順等軍協餉自袁保恒交

卸台務當經臣劄飭接辦糧台司道一遵向章按月將各該軍收解積欠銀數分晰開單呈報陝西撫臣核明

奏報移催各該軍原撥專餉此後有無增減應俟金順接收景廉移交核實汰遺添補足數按照實在馬步名額酌定歲需糧餉合明春所部名額餉需彙案咨報由臣另行核

奏此時未能懸擬張曜全軍分駐哈密一帶除歷年掛支安肅哈密官局糧料由臣作正開銷外所有開屯修渠應需氈條工具一切購製轉運腳價均由臣墊付俾得殫力經營惟東山熟地向係

纏回自種該軍新墾荒瘠灌水又遲故今歲收成較薄現據張曜呈報估計夏秋屯糧約得市斗毛糧四千數百石發碾收米約得淨糧八九十萬勛勉穀該營兩個月軍食臣前於四月間函致張

曜請將屯糧開報歸公准照安西市價核銀散給兵勇俾償其勞現經咨照張曜一照原議開報領價一面趕趁秋間次第修濬放渠翻犁明年屯糧所入當可增多此外官私各屯尙可採買市斗

三千石應照市價收買不准勒抑短價如與文麟明春軍食有礙卽作罷論已由臣分飭知照矣宋慶前遣總兵劉風清率步隊兩營分屯哈密原與張曜所部同屬豫軍聲氣聯絡該軍調回潼關後與張曜節制調遣意見符合該兩營正餉已由宋慶裁發至本年十月底止嗣從十一月起由劉鳳清造齋花名餉冊歸臣軍照章支放屯墾經費屆時由臣核撥作正開銷業准宋慶來咨覆之並咨行張曜知照矣臣現調集各軍汰遣添募製造糧運諸款並由臣隨時照量勻撥濟用將來彙案報銷此通籌出關各軍現在糧餉轉運兼顧哈密屯墾實在情形也至於新疆各城所駐大臣兵事餉事軍興以來舊制不可復按茲姑就近年部臣奏撥之款言之每月由直隸河南山東山西四省共撥銀七萬兩內除榮全奏准每月劃提銀二千五百兩以一半解榮全勻撥伊犁塔爾巴哈台以一半解烏城分撥烏魯木齊巴里坤哈密各城其分撥伊犁塔城一半餉內咨報臣軍有案者惟索倫官兵及額魯特察哈

爾人衆丁口二千八百名俸餉糧價每月劃分銀二千八百兩又分撥烏城一半餉內每月應劃分哈密辦事大臣一萬四千兩其餘銀兩該各城如何勻攤每城經費撥支若干滿綠各營實存官兵馬匹若干鹽糧馬價各需若干均未報臣有案核撥無從著手此外又有榮全專餉原協添撥每月共銀五萬兩塔城額魯特官兵俸餉各台駝價換防官鹽糧每月共銀一萬兩庫倫烏科各有專餉部臣指撥時有統解分撥之款有劃提撥抵之款有改撥墊撥指省解還之款有指提積欠坐扣之款各城奏撥前後異情各省撥解積欠異數往復咨查動經歲月核覆羈遲職是之故臣維綜核名實慎重財賦通盤規畫總司出入者部臣之職分也臣前奏設西征糧台專司臣軍協餉入款按月開單報部奏催咨提其於一切出款糧台並不干預亦有不能兼顧之勢也其各省關協濟景廉金順明春餉項則不盡由糧台經收山陝歸綏包頭等處各軍均設有轉運糧台多寡贏絀均由各統將自行核

奏臣不得知豫師專餉只由台代催非如穆圖善雷正綰所部甘軍均隸臣部裁併遣撤由臣會核辦理穆圖善所統步營送有總數名單雷正綰造有花名故能由臣統收分撥情異事殊未可同日語也近年新疆軍餉由各城大臣紛紛自行

奏撥固失畫一之規臣如查核未明冒昧具陳仍非核實之道可否照部臣劃解章程分段

飭下烏魯木齊都統伊犁將軍所屬各城歲需經費并現存滿緣換防官員兵丁實在名額應支糧餉分款核實報部由部通盤籌算仍就原協省分指撥有著之欸定限撥解不准推諉從前積欠新疆各城餉項分年掃數截清先行提解若干如何勻撥統由部臣核定撥解俾歸畫一而專責成其東南及川陝各省應協出關各軍新疆各城餉項凡移報西征糧台有案者仍可由台代催所有遵

旨查核情形謹據實陳覆再文麟派員赴蘭請餉已由臣墊撥銀

一萬兩明春上年負欠玉門採買糧價銀四千六百餘兩已飭該
管局員照付清欸其布倫托海台站經費由另片附陳以清眉目
合並聲明伏乞

聖鑒訓示

光緒元年八
月二十五日

請各省勻濟餉需片

再現在時局洋防塞防并重人共知之而能言之而難易之分不
能無辨洋防開辦一年經始之費可減塞上則正值用兵諸需從
新籌措如軍火器械一切海疆隨時隨地可辦者塞上則須預爲
籌計踰水陸萬里以達軍前始供取用一物之值購價加於運費
已相倍蓰尙須先備採運實銀乃期應手其不同者一也海疆皆
富饒之區各口通商又利源之所在以釐稅言除兩江歲入千萬
緡曾見章奏外粵浙所收較丁糧奚超一倍所需防費自己綽然
甘肅則素稱荒瘠通省丁糧一歲僅二十餘萬兩亂後則併此亦
難復按農民喘息僅延諸凡事務須由官多方措置始免槁餓空

山又地氣高寒物產本絀土俗不解經商服買出外求贏貧乏無聊坐以待困餅壘早罄挹注奚施其不同者二也東南澤國杭稻之鄉舟楫轉輸一帆千里商之謀生易裕官之籌措非艱甘肅則糧食升斗皆須負載而行數十百里之程非車駝莫致運脚之費每過糧價數倍且有多過十數倍者故東南各省糧與餉可合爲一西北則糧價脚價非由官另籌津貼不可其不同者三也用兵既久官私耗竭有時需用孔亟儲積已空則於富室大商挪移借貸隨時歸款甘肅則本地無可籌商如協款不到惟有借用洋商巨款及飭各台局向附近殷實商人議息籌借然借洋款則必指省關還款以印票爲憑借華款則必飭台局於附近商賈會萃之區籌辦以信約爲憑近則陝鄂遠則上海相距遼闊不能尅期得銀而華款又多零星湊集爲數無多比借款解至則守候領取者環待已久一散卽盡既非若海疆之就近取資可以省事又不能如洋商之易集巨款可以久支如非計無復之未肯出此其不同

者四也臣自出師江皖轉戰浙閩所歷皆兵燹之餘就地籌維未嘗奏請部款就浙之餉需以討閩賊就閩浙之餉需以討粵賊追事平調督陝甘而欠餉一律清還浙閩司庫亦漸有儲積蓋東南各省餉源可濬軍用易充轉運又便雖時艱孔急需浩繁但令經畫有方亦可勉資敷衍非若甘肅之無可取資仰給各省協款如嬰孩性命寄於乳媪乳之則生斷哺則絕也竊計沿海之防除從新購採製造應用款項所有餉需一切未必多於前此用兵之時而南北兩洋又兼六省協款之入撙節支用防患未形綽有餘裕乃各省應協甘款既不照常委解而各省之協濟洋防者又皆以洋防爲急塞防爲緩以致臣軍出款日增入款大減豈沿海防軍重於出塞征軍今日防海之事實急於出塞之事乎竊維餉源只有此數此壅彼缺勢所固然疆臣各轄一方畛域攸分恒情不免部臣總司

國計因時制用乃其所宜無論防患未形較之整軍待發者事勢

本自從容卽有時變故紛乘在陝疆就近籌維豈至遽形束手制用之道惟尙平均均無貧不易之理果能相其緩急爲之酌劑則裒多益寡自可兩全卽以欠餉而言臣軍積至二千六百餘萬兩之多所部除火食馬乾寒衣單衣外每年僅發一月餉尙須多方設措似此窘蹙事何可長各省雖同值時艱但各就本省應發餉需節縮一兩月勻濟甘肅在各省所欠者不過一兩月之數在臣軍前各增數月之數是富者減一孟之食仍免號飢貧人有壺飧之加卽期宿飽不獨通融挹注大局藉可維持兼之撙節支銷積欠亦漸歸有著此則微臣區區愚悃不得不披瀝陳之者也現當整理軍事之時念及軍儲不供刻深悚惕謹據實附片具奏伏乞

聖鑒訓示施行

光緒元年八月二十五日

軍機大臣奉

旨該衙門速議具奏欽此

光緒元年十月初六日准戶部咨開本部遵

旨速議陳明海防各餉係於各省應協西征軍餉之外添撥并非於各省應協西征軍餉之內勻撥各該省關自應各解各餉本毋庸作挪東補西之計以致有顧此失彼之虞應請

飭下各直省督撫將原協添協西征各餉及分解南北洋海防各款一體兼顧毋稍偏重卽飭各司道監督等務須各按各款照數清解不得因現有海防撥餉將西征各餉藉詞延欠等因具奏奉旨依議欽此

請 飭兩江迅解老湘全軍月餉片

再 此次成軍以出志在剿賊綏邊並爲建威銷萌之計惟自付年衰病久深虞精力未足副其志致貽

宵旰之憂亟圖倚任良才匡其不逮三品卿銜現署西甯道劉錦棠英銳果敏才氣無雙近察其志慮忠純尤堪重任現今率所部老湘全軍從征並委總理行營事務俾隨征各營得有稟承庶資

展布此外統領營哨各員均酌簡相信員弁樂事赴功者用之竊維西事之歲未卜何時專就劉錦棠一軍而言按月由金陵撥給餉銀四萬五千兩上年洋防議起兩江延未撥解現署督臣劉坤一雖知其艱疊飭委解然僅解至上年十二月止自今正以後八箇月共計欠解之餉三十六萬兩現正料理行裝無可籌墊伏懇天恩勅下兩江督臣迅將老湘全軍月餉如數委解前來俾得迅赴戎機此後該軍月餉仍請

飭兩江照舊按月委解毋再羈延庶足保茲勁旅謹附片陳明伏乞

聖鑒訓示施行

光緒元年八月二十五日

請飭福建迅籌欠餉片

再閩省協餉經

臣

奏准原協銀四萬兩添協銀四萬兩西征以來

每月僅解銀五萬兩同治十一年十月福建輪船局經費告匱

臣

以西事安危不過一時之計輪船控馭沿海實

國家久遠之規深慮功敗垂成奏請於臣軍餉項五萬內劃撥銀二萬兩交輪船收支以免廢輟計自同治十二年正月起共撥過船局銀二十六萬兩臣軍每月僅收閩省協甘餉銀三萬兩是年十月總理船政臣沈葆楨以船工將竣所加月款二萬兩可以節省具

奏鈔咨到臣當經咨明福建督撫臣以船局經費既無需劃撥自應仍解甘肅以濟軍需而該省於同治十三年三次解到銀九萬兩又本年五月撥解出關經費銀二萬兩統截至光緒元年六月止共欠解銀三百一十二萬兩新疆軍務方殷若如福建一省先後兩年僅解銀十一萬兩懸欠過多實非意料所及合無仰懇天恩飭下福建督撫臣迅速飭司趕緊設法籌解以符原案而速師期謹附片具陳伏乞

聖鑒訓示施行

光緒元年八月二十五日

軍機大臣字寄光緒元年九月初七日奉

上諭左宗棠奏軍餉支絀請飭速籌解濟並關外各軍及新疆軍餉請仍歸戶部核撥暨請各省勻濟餉需請飭戶部劃撥科城的餉各摺片本日已諭戶部速議具奏另片奏請飭兩江迅解老湘軍月餉及請飭福建迅籌欠餉各等語已寄諭劉坤一等卽速籌解矣關外事機甚急餉需支絀自不得不竭力圖維先其所急現在金順已抵古城各路官軍皆可陸續前進亟當乘此機勢趕緊設法進兵迅圖剿辦軍事餉事左宗棠仍當妥速區畫俾出關各軍整飾西進迅赴戎機一切情形並著隨時詳悉奏聞以慰廑繫將此由五百里各諭令知之欽此

請飭劉典迅速赴甘摺

奏爲軍務需人仍請

諭令候補三品京卿劉典迅速赴甘幫辦軍務恭摺馳陳仰祈

聖鑒事竊_臣前於六月二十八日拜摺懇

恩敕令劉典速赴蘭州幫辦軍務荷蒙

聖慈俞允嗣准湖南巡撫臣王文韶鈔送八月初三日代奏摺稿
知劉典以母年衰邁身病未愈籲懇

天恩養親治病以終餘年其時劉典尙未接到臣鈔摺咨會並函
告一切也旋接得臣函牘知己敍及親老告養人員羈以職守非
其心之所安已仰蒙

聖慈曲諒泣告其母謂既無職守進退似尙綽然如親體不適已
病有加屆時據實陳情或可仰邀

聖明鑒察諸子及其親屬又以
高厚之施

矜恤之德不敢負劉典之母感激涕零疑懼頓釋頃又接劉典手
函謂母已轉念並飭其促裝惟母壽在十月初旬擬叩祝後乃可
就道計其發函之時尙未欽奉

諭旨也如蒙

天恩仍令劉典幫辦陝甘軍務仰懇

速敕王文韶轉飭劉典迅卽啟行幫辦陝甘軍務計

諭旨到湘不過旬餘較由臣欽奉鈔咨轉寄湖南可早二十餘日

臣俟劉典到甘將軍務逐一交代啟程西征不至稽延過久區區

愚忱伏乞

皇太后

皇上聖鑒訓示施行光緒元年九月二十八日

軍機大臣奉

旨昨據譚鍾麟奏請敕劉典迅赴蘭州已諭令王文韶傳知該員

欽遵前奉諭旨迅速起程矣欽此

楊昌濬可資臂助片

再陝甘軍務近雖幸承

福庇一律肅清惟轄境兼蒙古回番之地因習俗而施政教隨時

隨地剛柔異宜現雖安謐然建威銷萌規畫久遠者實難悉舉入

告也又臣所部各軍雖非一省一路之人究竟楚產為多各將領

皆十餘年前舊部未弁勇丁積功拔擢所致。之馭軍別無才能
權智所恃者誠信不欺絲毫不苟不敢以一時愛憎稍作威福政
失人心行之既久湖湘子弟習而安之雖欠餉積多尙無異說回
思咸豐十一年成軍以出日在憂危惕厲之中至今猶惴惴焉。臣
茲奉

命督辦新疆軍務雅自慙非分然諍不得辭而內顧茫然時形憂
懼諸將士聞臣荷

新命多赴蘭州自請隨征出塞者默察隱情蓋均慮及餉項積欠
爲數太鉅出塞遠離恐軍情未帖然也竊維咸豐十年臣奉

命襄辦江南軍務其時辦理臣軍營務者三人一道員王開化不
幸積勞早逝蒙

恩予諡貞介一劉典一浙江巡撫臣楊昌濬皆平時道義切磨潔

清自矢堪共患難之人時論或有不同而信行相符至今實堪覆

按臣茲遠出兵事餉事不能不以陝甘爲根本若後顧不免他虞

大局何堪設想臣之所以顛懇

天恩簡劉典幫辦陝甘軍務者以此邸鈔楊昌濬因病請假已蒙

天恩給假一月如楊昌濬能去浙度隴則臣更可資其臂助微臣之

幸亦西事之幸也謹披瀝附片陳明伏乞

聖鑒訓示施行光緒元年九月二十八日

軍機大臣奉

旨另片奏浙江巡撫楊昌濬如能去浙度隴可資臂助等語西陲

軍事緊要襄辦需人惟楊昌濬係封疆大吏如今前赴軍營應如

何位置之處著該大臣先行奏明

請旨辦理欽此

暫借洋商巨款以資接濟摺

再泰西各國遇有兵事向商人借用巨款相習為常洋商之來華

貿易者每以此為利從前尚有以應需借用洋款與否向問者可

知用兵借銀本各國常例商情稱便無華商居奇之心且借數愈

多則息銀愈減亦與華商計畫迥異沈葆楨籌辦台防時聞初議借用洋款一千萬兩每歲給息銀八釐洋商樂從并無推諉其時卽有爲臣籌策者謂隴局艱難至此盍亦仿照辦理免致坐失事機臣以關內業已肅清宜力圖樽節故祇擬商借三百萬兩嗣奉命督辦新疆軍務籌辦關外採運出款日增而擬借洋款又因部議游移洋商見胡光墉取銀遲緩懷疑未釋前又因粵東故生枝節畫押蓋印均多推諉商情不能釋然雖勉踐前言而發銀遲緩致臣處遣撤諸事未能應手徒耗月息而應協各省見已借洋款三百萬兩遂謂隴餉或可稍資周轉漠不關懷不知臣因洋款遲到失飭各台局息借商各款外祇一百七十餘萬到營耳頻年艱苦竭蹶之狀莫此爲甚臣不善經理人乎何尤見在出關各營均已齊集涼州日加訓練擬於明正拔隊先行臣之親軍亦已整理完繕俟幫辦軍務臣劉典到蘭將留防善後諸務面商一切不過旬日亦卽啟行惟默計前途軍火子藥糧食柴草雖略有儲峙而

行餉不能攜帶一月倘後路無餉接濟不堪設想又出塞之行成敗利鈍非能逆觀縱令事機順利而合新疆周二萬里地方規畫久遠較之洋防七千餘里局勢尤寬歲月久暫遲速非可逆計徒擊空拳空談遠略非特無其理亦無其事暫擬籌借洋商巨款實迫於萬不得已之苦衷伏懇

聖慈特飭沈葆楨仿照台防辦法代臣籌借俾臣得所藉手稍圖尺寸之效西事之幸臣之幸也至其息銀多寡及一切辦法請由沈葆楨酌定臣不與聞緣沈葆楨素爲各國所信服商借洋款曾有成議此時重尋舊說可免洋商疑慮又辦理南洋事務就近與各省關商議可無窒碍較臣所處尙易爲功區區愚忱非敢有他謹并以附陳伏乞

聖鑒訓示施行

聖人示教

聖人示教

於世間則曰無善無惡。無善無惡者。以國無善。則其政亦無

善。於世間則曰無道無德。無道無德者。以國無道。則其德亦無

道。於世間則曰無義無禮。無義無禮者。以國無義。則其禮亦無

義。於世間則曰無信無忠。無信無忠者。以國無信。則其忠亦無

信。於世間則曰無孝無悌。無孝無悌者。以國無孝。則其悌亦無

孝。於世間則曰無節無義。無節無義者。以國無節。則其義亦無

節。於世間則曰無廉無恥。無廉無恥者。以國無廉。則其恥亦無

廉。於世間則曰無恥無節。無恥無節者。以國無恥。則其節亦無

恥。於世間則曰無節無義。無節無義者。以國無節。則其義亦無

新疆圖志卷九十四

奏議四

兩朝 左宗棠三

哈密辦事大臣裁併營伍請飭撥專款摺

覆陳借用洋款摺

會報抵蘭出塞日期摺

附陳新疆賊勢片

馳抵肅州遣軍出關摺

進攻瑪納斯大概情形片

擬緩借洋款情形摺

出關諸軍進至古城留防要隘摺

覆陳杜賊紛竄摺

官軍攻拔古牧地堅巢克復烏魯木齊迪化州大概情形摺

官軍攻拔古牧地克復烏魯木齊迪化州戰狀摺

哈密辦事大臣裁併營伍請飭撥專款摺

竊哈密巴里坤古城所駐各大臣應就現存旗營核定糧餉以缺額過多准照舊額馬步挑補足數但責其保守城池不必責以戰事脫屯丁伍籍散之歸農業經

奏准通行在案其文麟兼帶威儀馬步內步隊各營查係同治六年以後收輯關內外流亡丁口分派安西哈密塔爾沁等處雖挂名伍籍緩急難恃所稱專餉除新疆月餉七萬兩經榮全等奏准每月由劃解烏魯木齊都統一半內分撥哈密一萬四千兩欠解雖多款尙有著其餘巴哈分成餉暨同治六年以後疊次奏提哈密專餉糧價等銀均係隨時指提非如金順明春等軍專餉由部臣核定每月若干分省指提專款收解短欠按月報部催提之比其哈密開屯事宜自張曜到彼由臣籌墊經費與文麟張曜商辦修濬水渠分段開屯漸收成效然文麟今年屯糧據報僅數一月軍食准文麟咨糧餉兩紕請由臣籌撥核奏臣比屬其欽遵前奉

諭旨大加裁減酌留精壯數營開造花名奏咨辦理並於無可騰挪之中墊撥銀一萬兩俾濟急用嗣奉

諭旨文麟奏懇陳需餉迫切情形請飭迅速籌撥一摺哈密各營月餉積欠甚鉅情形困苦飢潰堪虞亟應籌撥餉銀以資接濟該辦事大臣已照左宗棠所咨裁汰兩營弁勇以爲撙節餉糈之策現在存營弁勇計共四千人卽著左宗棠按照楚軍章程將該軍馬步八營月餉速爲籌撥並於前次借撥一萬兩外再行撥借銀數萬兩發交文麟所派在省請餉委員星速解赴該城以濟要需毋得意存膜視欽此等因正議奏覆間適准文麟移送續裁馬步清冊到臣內開步隊兩營每營正勇五百名連營哨兵弁子藥公私長夫共七百八員名馬隊營以二百五十騎爲一營每營連營官弁五長夫共五百八員名又馬步小隊二百名管帶官弁五員名以上馬步通共官弁勇夫二千六百四十員名又隨營辦理各營務各項差使文武員弁一百八十餘員車駝夫丁匠作斗書跟

新編國志
卷之四
役四百三十餘名裁撤餘丁八百名仍就哈密沁城兩堡分爲十屯設管理屯田官役三十三員名咨請分別核奏前來較前次自奏裁減兩營外復裁汰數百名惟未據將需餉若干約定成數若遵

諭旨按臣軍奏定餉章核估計馬步四營又二百名一月共需正餉草乾等銀計一萬三千三百餘兩合之糧價津貼及軍需等款每月數千兩共需銀二萬兩以一年計之卽需銀二十四萬應否仰懇

天恩飭下部臣仍就原協哈密軍餉省分指定每省每年協濟若干按年按月定限解撥遇閏照加不准緩欠從前積欠哈密軍餉應否分年勻解抑或劃斷舊欠從新核撥以清起訖通由戶部奏明辦理如遇協餉遲到仍由文麟查照臣軍章程按月發給鹽糧乾銀公費以資點綴臣軍餉項積欠已至二千七百餘萬兩更何能舍己芸人爲文麟代籌挪墊惟文麟既自知餉源涸絕復行裁

減願比楚軍發餉章程臣亦未便愒置擬於該軍協餉遲到時畧與通融但未可恃以爲常耳至哈密城現分十屯自應由文麟查照臣前奏准原案按丁授地酌發牛籽收穫後繳本歸官餘糧仍照時價買供軍食官私兩益毋須另請經費其額設哈密辦事大臣經費向例每五年闕銀五萬兩久已停解文麟此時兼帶馬步自可毋庸另請經費而哈密協營新募士兵八十名業由臣核准查照安西各營餉折現章權歸軍需請領該廳通判准照內地停征州縣例支給薪公統由臣軍餉項挪墊作正開銷自無須文麟籌給所有文麟兼帶馬步遵旨裁併實數懇

飭撥有專款定限撥解各情謹會合幫辦新疆軍務大臣烏魯木齊都統臣金順合詞恭摺馳陳伏祈

聖鑒訓示

覆陳借用洋款摺

竊臣於光緒二年二月十七日承准軍機大臣字寄二月初七日奉

上諭沈葆楨等奏籌議關外餉需礙難借用洋款暨江蘇擬力籌西征協餉各摺片據稱借用洋款耗息甚多海關部庫均受其害應於各省關移緩就急並江蘇竭力籌措等語所陳亦屬實在情形西征餉事甚殷自當通盤籌畫於國計軍餉兩無妨礙方爲有濟應如何斟酌盡善之處著左宗棠妥爲籌畫迅速具奏原摺片著鈔寄左宗棠閱看沈葆楨所請將湖北湖南協濟江防銀兩移解西征糧台濟用候左宗棠覆奏到日再行降旨欽此跪誦

諭旨並細閱原奏摺片具悉江蘇撫臣竭力籌措兩江督臣將兩湖協濟江防銀兩撥西征深維大局苦心微臣身值時艱一籌莫展徒煩遠省疆臣代紓籌策感愧奚似豈敢乞餘不足又顧之他益增歉仄願事有萬不得已者不敢自安緘默謹就愚見爲

皇上陳之臣之奏借洋款原因各省關應協款項積欠成鉅陳陳

相因馴至洋防議起照常年又減至一半以外頻催罔應計無復之萬不得已而有此請非不知借用洋款非正辦也沈葆楨與臣素洽其清強有執臣常自愧不如原奏義正辭嚴復舉兩湖應解江防銀兩移撥西征亦實情理兩得然其代爲臣謀究不如臣之自爲謀也姑就其論國債一說詳之泰西各國經常用度原有定數其格外之費均由其國富商酌度承認自出貲本經營由公司抽收稅課以裕國用如開礦治水諸大工作原奏所謂輕利博重利者是也下非放債上非借債不得概以國債名之間有由其官中授意興辦如英吉利開印度通緬達滇邊山路圖就近銷售鴉片則官主謀而商應募不在此例至各國用兵除報怨雪仇外均爲其國商賈爭利起見兵費例由紳士商民認定計期取償於官則爲國債非臣臆說也原奏英美有國債不失爲富強西班牙土耳其以債傾國日本蹈其覆轍而謂英美舉債於本國猶是藏富於民非西班牙等國輸息鄰封之比是矣至論各國舉債攸殊效

有異同之分尙非探原之論夫英美富强甲於海國由來已久兵費借其本國之債不待求助鄰封自然之理西班牙不善經營土耳其耽吸鴉片日本因欲去其大將軍之逼舉國以奉西人割地以給俄人出其額征爲質各國衰亡之徵由其自致若謂借本國之債者必富且強借鄰封之債者自貽困蹙而引之爲借用各國洋款之戒非定論也就日本借用洋款而言因其國有逞志朝鮮取償國債之心洋人遂以此蠱之陰爲各國外海總埠頭之計日本未嘗不知祇緣旣與定議不敢復有異同隱忍遷就勉而出此非所論於西征一局夫西征用兵以復舊疆爲義非有爭奪之心借千萬鉅款濟目前急需可免懸軍待餉十年計息所耗雖多而借本於前得以迅赴戎機事之應變者可以速辦如減撤防軍以省糜費籌設新制以濬利源隨時隨處如意收束計十年中所耗之息可取償十年之中非日本之尋釁舉兵與洋人共利可比至西班牙舉債經商本奸商騙賴之類也土耳其舉債傾國本紈袴

敗家之類也烏可同年而語哉以海疆按年應協之餉了還按年應還陝甘借款本息不必得半而是大有造於塞防而無所損於洋防原奏謂洋款取償於海關海關仍待濟於各省各省僅籌協餉已催解不前令兼籌協餉之息何能如期以應查借用洋款向章海關出票定數督撫鈐印歸款此次款法自亦如此各省關印票之數原劃定各省關應協之款並非於協餉外兼籌協餉之息事理著明非可隱占其與解部之款本不相涉原奏所稱海關病部庫病者其原在各省協餉之愆期現奉

諭旨自光緒二年起如不能照原撥添撥數目解至八成以上將該藩司監督照貽誤京餉例由該部指名嚴參此後海關自可不至代人受過平心而言借用洋款實於中國有益無損泰西各國興廢存亡並非因借債與不借債之故其理易明卽以現在局勢言之臣非先後借用洋款則此軍不能延至今日上年李鴻章有二千萬待借之奏卽沈葆楨辦理台防亦曾借用洋款六百萬兩

嗣因倭事速定部議停止四百萬今倭事息而西事殷重理舊說似非不可應請

貞飭下兩江督臣卽代臣借洋款四百萬兩迅解來甘臣得此款

清還新借陝鄂上海各款一百二十萬兩尙可餘二百數十萬兩

暫資敷衍如各省關自本年正月起協款能解足八成以上臣軍

有的餉源源而來苟可設法騰挪何肯以催餉頻煩自取憎厭尙

各省關未能如數解報微臣計無復之洋款既不能借則非息借華

商巨款不可而息借華商巨款若不謀之兩江則又無從著想此

臣之苦衷所不得不預爲陳明者也江蘇協款每年除劃抵前借

洋款本息外僅應補解二十餘萬兩蘇省雖允竭力籌措爲數非

多而協款外尙有應解老湘營每月四萬五千兩一款甫解至上

年七月計截至今正已欠解六個月沈葆楨雖將湖北欠解江防

之十二萬兩湖南欠解江防之八萬兩撥解西征然以之抵老湘

營月餉截至今正尙欠七萬兩原奏穆圖善月餉一萬兩關內外

各軍均由臣酌量統收分撥意在清眉目一事權亦俾臣得稍資周轉耳然自統收分解之議起臣之軍餉正因墊解過多受其累疊經奏明有案何能稍資周轉乎總計沿海各省關協甘之款山東爲數少而報解勤浙江則更不遺餘力其欠解之最多者閩爲最粵次之粵東瑞麟故後閩自英桂內召後解欸日見減少閩之積欠則已至三百餘萬矣合無仰懇

天恩飭下兩廣督臣廣東撫臣福建督撫臣盡力籌維務將本年

應協甘餉如數迅解共支危局毋推以八成自限則猶隴餉之一

大宗也臣拜摺卽行馬步共二十九營每營僅攜四個月鹽菜馬

乾就道幸各處糧料水草均已預備師行無阻當合營起行臣適

奉

諭旨准借洋欸士氣甚奮閱沈葆楨原奏則未敢宣布也謹一併覆陳伏乞

聖鑒諭示

光緒二年二月二十一日

會報抵蘭出塞日期摺

奏爲會報抵蘭出塞日期恭摺仰乞

聖鑒事竊臣宗棠於上年十二月四日附

奏擬俟臣劉典到蘭將留防善後諸務面爲商定卽起行而西

臣

劉典十一月二十日由湘啟行沿途風水阻滯樊城登陸入秦度
隴雨雪載途感受寒疾仍按程行走二月初八日抵蘭連日商確
軍事及善後未盡事宜均有端緒正值河冰欲泮橋難遽架遲至
二十一日臣宗棠始克率親兵十哨白馬氏練丁一營馬隊四起
登程前進所部前隊二十四營則已於正月二十八日二月初二
初八十五等日陸續由涼州拔行令至肅州取齊分起次第繼進
大約由肅州以西按台站行走中途無須停頓由巴里坤達古城
十一站應察看地形留駐數營防賊旁竄抵古城後須軍糧取齊
乃可趣戰臣宗棠所帶親兵馬步各營暫住肅州俟前路糧料運
至古城後路肅州安西哈密各有儲積乃可前進其前路進止機

宜已面授總理行營營務處西甯道劉錦棠令其相機辦理不爲
遙制俄糧之運古城者截至四月可四百八十餘萬觔僅敷金順
全軍馬步之需繼進之軍所需糧料除官私馱騾駝隻裝運軍士
自行裹帶外餘均取給哈密巴里坤哈密糧源自甘州肅州安西
而來巴里坤糧源自歸化包頭甯夏而來遠者五千餘里近者三
千數百里截至四月巴里坤存糧可六百餘萬觔其安西哈密之
糧運至古城者可四百餘萬觔存儲待運者尙千萬觔然勞費已
不勝計矣其巴里坤有數徑可達安西不復徑由哈密已飭記名
提督徐占彪俟臣宗棠到肅後帶所部馬部四營駐之哈密則有
張曜一軍馬步十二營宋慶所留步隊八百餘人擇要扼守以防
土魯番東犯之賊如此庶後路常通糧運不匱乃可言勁氣直達
也臣等連日籌商關內外全局布置大概意見脗合彼此互相勗
勉冀毋負

聖明委任之意征防各軍和輯如常士氣甚奮尙堪仰慰

慈懷謹一併陳明伏乞

聖鑒訓示 光緒二年二月二十一日

附陳新疆賊勢片

再烏魯木齊踞逆本地土匪居多逆首白彥彪所帶陝回及甘肅
 從逆之回踞紅廟子古牧地瑪納斯等處而皆與南路踞逆回酋
 帕夏通帕夏即教罕部安集延回酋和碩伯克也帕夏當即伯克
 轉音俄羅斯既滅教罕踞其塔什干都城教罕所部安集延獨免
 同治四年乘回部之變入踞南路喀什噶爾及各回城於是吐魯
 番闢展以西土回皆附之帕夏能以詐力制其衆又從印度多購
 西洋鎗礮勢益猖獗陝甘竄踞之逆及本地土回均倚之爲重然
 不敢顯然與俄羅斯較是俄兵之強可知俄人頗言其狡悍異於
 諸賊以教罕向未用西洋鎗礮安集延多洋鎗隊而帕夏又能用
 其衆是安集延之強亦可知官軍出塞自宜先剿北路烏魯木齊
 各處之賊而後加兵南路當北路進兵時安集延或悉其醜類與

陝甘竄逆及土回合勢死抗官軍當有數大惡仗如天之福事機
順利白逆殲除安集延之悍賊亦多就戮由此而下兵南路其勢
較易是致力於北而收功於南也若北路軍威未至而賊先圖自
固不敢互相援應但作守局以老我師則曠日持久亦在意中外
間議論顧謂軍臨前敵陝甘竄回必有倒戈之事臣不敢信其誠
然卽令誠然白逆必遁竄入南路安集延未經重創其狡焉思逞
之志不忘如其併力穩抗自可獎率師徒爲一了百了之計倘詭
詞乞撫仍思踞我腴疆或兵至則逃妄擬乘間竊逞爲死灰復然
之計則新疆隱患方殷豈可不預爲之所議者但以陝甘竄回及
新疆各城爲慮不復知有安集延竄踞南路之事或以爲易或以
爲難或以爲事可緩圖或以爲功可速就或主撤兵節餉之議或
並爲難得易失之談辯說紛紜橫議歧出揆其命意皆因裨益洋
防起見豈眞由衷之談哉臣本一介書生辱蒙

兩朝殊恩高位顯爵出自

逾格鴻慈久爲平生夢想所不到豈思立功邊域覬望

恩施况臣年已六十有五正苦日暮途長乃不自付量妄引邊荒艱鉅爲己任雖至愚極陋亦不出此而事顧有萬不容已者烏魯木齊各城不克無總要之處可以安兵烏魯木齊各城縱克重兵鉅餉費將安出康熙雍正

兩朝爲之旰食者準部也乾隆中準部既克續平回部始於各城分設軍府然後九邊靜謐者百數十年是則拓邊境腴疆以養兵之成效也今雖時易勢殊不必盡遵舊制而伊犁爲俄人所據喀什噶爾各城爲安集延所據事平後應如何布置尙費綢繆若此時卽便置之不問似後患環生不免日蹙百里之慮區區愚忱竊有不敢不盡者謹將新疆賊勢大概一併陳明伏祈

聖鑒訓示

光緒二年二月二十一日

軍機大臣字寄光緒二年三月初一日奉

上諭左宗棠劉典奏會報抵蘭出塞日期左宗棠新疆賊勢大概

情形請籌洋款四百萬丁日昌奏洋債不宜多借各摺片覽奏均悉劉典現已馳抵蘭州所有關內關外各事宜左宗棠業已統籌全局布置妥協督率馬步各營分起西進爲規復新疆各城之計足見公忠體國力任其難該督抵肅州後應如何次第進兵之處均著隨時相機籌辦朝廷不爲遙制所陳新疆軍情賊勢瞭如指掌惟期節節掃盪收復烏魯木齊吐魯番以次廓清南北兩路奠定西陲爲一勞永逸之舉後路催運糧餉軍火關係緊要劉典當隨時籌畫以資接濟左宗棠出師塞外必須士飽馬騰方足以壯軍威而張撻伐各營將士踴躍前驅尤深廑念各省協解西征銀餉未能足數致有積欠口糧此次遠道進兵糧餉必須充裕左宗棠前議借洋款一千萬兩以備應用因耗息過多現請減借用四百萬兩係爲節省經費顧全大局起見惟現當大舉深入的發欠餉預備行糧需款甚鉅恐不足以資周轉該督旣以肅清西路爲己任何惜籌備鉅款俾敷應用以竟全功加恩著於戶部庫存四

成洋稅項下撥給銀二百萬兩並准其借用洋款五百萬兩各省應解西征協餉提前撥解三百萬兩以足一千萬兩之數該督得此鉅款務將新疆軍務早日蒞事迅奏膚功國家經費有常似此竭力湊撥可一而不可再萬不可虛糜帑項日久無功洋款如何籌借著左宗棠自行酌度奏明辦理撥用四成洋稅二百萬兩如還解部庫著戶部籌撥歸款所借洋款著仍宗前旨在各省應協西征新餉內分年撥還各省應解西征協餉現今提前趕解三百萬兩並著戶部酌量指提毋任延宕其餘應解西征協餉仍著各該將軍督撫懍遵前旨嚴飭各該藩司監督儘力報解毋得以八成自限左宗棠奏閩粵欠解較多請飭將本年應協甘款如數迅解等語著該督撫遵照辦理籌借洋款本係萬不得已之舉因西征大局所關是以允借五百萬兩俾利軍行丁日昌所陳變通西餉辦法亦有所見並先後湊齊六十萬兩匯由沈葆楨處彙解具見急公嗣後應解左宗棠協餉仍著會商文煜李鶴年源源籌辦

以應急需將此由六百里諭知左宗棠劉典文煜沈葆楨李鶴年
劉坤一翁同爵吳元炳裕祿劉秉璋楊昌濬丁日昌丁寶楨鮑源
深李慶翱譚鍾麟王文韶張兆棟並傳諭文格李文敏知之欽此
馳抵肅州遣軍出關摺

竊原於二月二十一日由蘭州拜摺起行沿途整隊前進三月十

三日駐軍肅州總理行營營務三品卿銜二品頂戴法福靈阿巴
圖魯劉錦棠先率馬步全軍駐於城北記名提督新授漢中鎮總
兵譚上連領所部先進記名提督甯夏鎮總兵譚拔萃繼之記名
提督陝甘鎮總兵余虎恩又繼之四月初三日劉錦棠親率漢回
馬步各軍禡旗啟行擬抵安西後分起以次前進蓋師過哈密行
戈壁中糧糗可裹帶以趨柴薪草束可儲峙以待惟水泉缺乏雖
多方疏濬不能供千人百騎一日之需非分起續進不可也見據
譚上連稟已抵巴里坤譚拔萃已近哈密余虎恩已過安西臣因
古城所收俄糧尙祇四批金順緘贖頻來需糧甚急得三百六十

萬觔不能見新臣允於巴里坤取糧百萬觔哈密取糧二百六十萬觔以供軍食而古城所收俄糧四批亦概付之計新糧可資接續矣惟劉錦棠馬步二十五營所需軍食本指巴哈存糧轉運古城茲兩處已分濟金順雖餘糧尚多而一時運脚難期周轉缺乏堪虞除前雇商駝萬隻由安西哈密徑運古城外復由肅州儘官民商三項車輛裝糧料運古城以廣儲峙幸歸化包頭甯夏商駝之運巴里坤者踴躍如常存糧尙敷轉饋劉錦棠到哈密後計古城儲峙稍充卽率各營長驅大進直搗賊巢戰事當在五月閏五月之際屆時節近秋初新穀遍野有糧可因轉戰而前士氣自倍臣與劉錦棠熟商進兵機宜以先後遲速爲穩者此也幸蘭州涼甘各屬俱霑春霖肅州安西於三月二十一二等日同霑優渥農祥有兆豐稔可期如天之福關內外幸獲豐年則就近採運供支勞費亦可漸圖節省而西征大局庶幾速振矣所有分起出關事宜謹據實陳明伏祈

聖鑒訓示

光緒二十一年四月十三日

進攻瑪納斯大概情形片

再於本年三月二十日在肅州行營准金順咨稱統領吉江馬隊涼州副都統額爾慶額咨報本年正月間聞白逆有糾合瑪納斯南北兩城踞回竄擾糧運之事因與督帶定營馬隊總兵馮桂增會商振武統領參將徐學功各率所部會師於大河廠相機進取瑪納斯城以期扼險防竄籌商既定額爾慶額與馮桂增卽於正月二十七日率隊先行徐學功繼之二十八日額馮兩軍營抵大河廠因待徐軍未至遂於是夜先進二十九日寅刻徑薄瑪納斯北城馮桂增等改騎爲步由城西北兩面猛登斃守城賊回二十餘名開門延納官軍城中踞賊驚起拒敵馮桂增率部巷戰額爾慶額麾軍繼進鏖戰踰時斃三百餘名並陣斃兇悍逆目翟老四嘎一兩名餘賊卻聚城東隅天色已明南城踞回見北城危急連施大礮官軍少卻南城賊馬步千餘乘勢蜂擁而至北城東隅

踞賊復出死拒馮桂增縱橫馳突身負數創額爾慶額亦奮身抵敵背足受傷俱裹創力戰馮桂增復受傷墮馬賊衆猛撲昇擁入城額爾慶額憤極陷陣斃賊十餘名因弁勇傷亡已多勢不能支遂卽收隊回防徐學功於是日行踞瑪納斯城十餘里地方見事已敗亦卽撤回額軍陣亡官兵共計五十五名馮桂增所部暫飭都司馮以和接帶整理又據徐學功報戰事失利畧同惟所稱未進之先額爾慶額等與徐學功原議於正月二十九日由大河廠會師進取議定後額爾慶額馮桂增兩軍先期進取徐軍屆期進發行踞瑪納斯城十餘里地方遇兵勇紛退額爾慶額帶傷回防徐學功率所部前救護敗殘兵勇收隊回營沿途探詢額軍官兵約陣亡三十餘員名馮軍弁勇約陣亡一百六七十名額爾慶額挑帶駐防沙灣土勇約陣亡十餘名金順以徐學功救援不力先摘其翎頂額爾慶額進志過銳亦未便免議等因咨核

奏前來續接額爾慶額緘牘深以徐學功進兵遲緩爲言並稱前

報陣亡官兵五十五員名內有被甲金有一名逃回實共陣亡五十四名其馮軍陣亡弁勇據營員稟報共計一百九十一名與徐學功所報兩軍陣亡人數亦有未符。維襲攻堅城本難得手而馬隊黑夜撲城尤爲希見之事額爾慶額馮桂增久歷行間不應冒昧至此此致挫之由實因輕進貪功咎由自取徐學功行近瑪納斯地方知前敵已敗不卽麾軍馳援雖屬無可辭咎惟據彼此牘報情形而言額爾慶額馮桂增原約二十九日進攻並未明定時刻嗣兩營於先夕寅刻麾馬隊前進則非徐學功所能前知且額爾慶額於襲攻瑪納斯城賊巢事前並未咨商金順事後緘牘遲至兩月始抵肅州不但馮桂增存亡未悉卽所部金有一名敗後逃回當時亦未及詳關外軍務文報多不足憑。未敢輕率請旨現飭總理行營營務處道員劉錦棠逐細查明具覆再會金順據實馳報以昭核實謹先將大概情形附片陳明伏乞

聖鑒訓示

光緒二年四月十一日

擬緩借洋欸情形摺

竊臣於三月十三日馳抵肅州後十六日准兵部遞到軍機大臣字寄光緒二年三月初一日奉

上諭左宗棠出師塞外必須士飽馬騰方足以壯軍威而張撻伐各營將士踴躍前驅尤深廑念各省協解西征餉銀未能足數致有積欠口糧此次遠道進兵糧餉必須充裕左宗棠前議借洋欸一千萬兩因耗息過多現請減借用四百萬兩係爲節省經費顧全大局起見惟現當大舉深入酌發欠餉豫備行糧需款甚鉅恐不足以資周轉加恩著於戶部庫存四成洋稅項下撥給銀二百萬兩並准其借用洋欸五百萬兩各省應解西征協餉提前撥解三百萬兩以足一千萬兩之數洋欸如何籌借著左宗棠自行酌度奏明辦理欽此三月二十五日欽奉

寄諭部撥四成洋稅銀二百萬兩見擬分作四批由順天府接續領解交西征糧台分收轉解左宗棠軍營此項庫欸該部請於西

征協餉除提前之三百萬兩及兩次所借洋款劃還本利各銀若干外所餘本屬不多若令儘數解還部庫恐於該大臣軍營餉需仍屬不敷周轉著改於去歲議撥南北洋海防經費之四成洋稅內按年著提一半將此次部撥二百萬兩陸續扣還所借洋款著左宗棠詳細核定各省協餉內某年某省應還借款若干分晰具奏各該將軍督撫卽將該省協餉解過西征糧台及歸還借款本利銀兩各數目隨時咨報戶部核查倘不能解至八成以上仍著該部嚴參懲辦欽此跪誦再四感激涕零不能自已伏維出塞之師實緣局勢所在不得不然迥非贖武窮兵侈言遠畧可比聖明洞矚邊方久遠情形

軫念征軍積年苦况

特發德音允撥部存巨款

慈諭各營將士踴躍前驅尤深履念而慮微臣減借洋款難資周轉

允借洋款五百萬兩

令其自酌度辦理

慈懷之曲體邊關將卒無微不至如此何以復加又

慮部議各省提前協解三百萬兩外儘數解還庫款於臣軍餉需

難資周轉

飭改於洋防經費四成洋稅內按年扣還紓應協各省之力不强以難贍邊遠受餉之軍不限以數

天恩高厚

聖慮精詳非但時事之幸臣軍之幸卽各省督海關諸臣亦無不

感欣同深臣於欽奉

恩旨後次日大饗諸軍宣示

朝廷德意令諸將校傳諭士卒歡聲雷動僉稱誓當竭力圖報有

口同聲

臣詢諸統將從前發四箇月鹽菜馬乾銀兩尙餘若干則

僅有存者比以俄糧遲到先挪此項糧價銀十二萬五千兩分給

裹帶均欣然喜出望外譚拔萃余虎恩劉錦棠率各起馬步出關

時_臣於餞送後遣人覘之還報士飽馬騰整列齊行無落後者觀士氣之可用知

皇仁之入人者深_臣之請借洋款也原因協餉積欠太鉅類催罔應計無復之而舉債用兵本泰西各國之常不足爲異借本愈多則期限愈遠取息愈薄尤於時局相宜所以擬定千萬者計得此大宗見餉除撥還歷年本息外協餉尙多贏餘庶壹意經營事之應辦者及時舉辦尙冀得所措手以濬利源非僅恃此款爲一歲計也所以必商之兩江者上海爲中外商賈銀洋匯萃之所商借洋款恒必由之而現任督臣原有借定未用之款重理舊說息耗不至頻增茲既窒得不行復奉

諭准借五百萬兩自行酌度敢不切實圖維以期周妥竊計本年應得的餉除部款二百萬兩協款提前三百萬兩外各省尙有應解八成以上餘銀以之清還陝鄂滬新借各款尙可存留四百數十萬兩計連閩十箇月內餉需得資周轉是本年不借洋款尙無

新編國志
不可惟此後各省關協款衰旺未可預知而懸軍深入道遠費繁若無實餉濟接不堪設想近接上海轉運局道員胡光墉等稟稱上年花旗普魯社兩國在海島開鑛獲銀甚旺若與商借可期有成臣等答以現奉

恩諭西征餉事目前尙資接濟如可由陝甘總督衙門出給印票無須借重兩江海關固爲簡捷苟必須海關出給印票則浙粵或容商量惟借款不須向英商議及卽滇案速結亦不復向其商借並須預爲說明彼此成借不更關白英人惟借少則期近息重恐未能如台防十年八釐之輕耳臣之擬待來年始行議借者一則遲借一年可省一年息耗一則明年議借隔年始還一期兩次彼時臣前借之三百萬兩本息已悉數還清界限分明各省關協餉從後年撥還借款亦不至稍形迫促屆時臣當詳細指撥再候飭部議覆施行至陝甘誼均一體甘餉苦絀情形撫臣久已深悉譚鍾麟欽奉

諭旨垂詢江蘇月協陝西一萬兩能否撥歸西征卽飛緘抵陝無
論陝省如何爲難必當先其所急已緘復卽由撫臣會銜具
奏免致上煩

宸厪所有微感激下懷及籌辦情形縷細陳明伏祈

聖鑒訓示施行

光緒二年四月十三日

出關諸軍進至古城留防要隘摺

竊臣於四月十三日馳報資遣馬步各軍分起出關後疊據總理
行營事務三品卿銜布政使銜法福陵阿巴圖魯西甯道劉錦棠
稟報分統右軍記名提督新授漢中鎮總兵譚上連甫抵巴里坤
諜報馬賊由布倫托海出紅柳峽僻逕繞過古城聞將折竄歸巢
譚上連率所部急進比訶知賊騎二百餘已由南山竄向吐魯番
西去譚上連率所部扼紫芟芟台色畢口大石頭三箇泉等處以
護運道自率兩營進駐古城劉錦棠飭繼進馬步各軍均就哈密
取存糧分起短運踰天山以抵巴里坤由巴里坤短運抵古城限

閏五月底一併取齊候令進止自率輕騎赴濟木薩金順行營商定方畧並赴前途察度地勢以便布置屯糧護運輓轉輓事宜訶知土回馬明等結壘之處爲古牧地迤西而南數十里爲烏魯木齊紅廟子官軍必先攻古牧地撤烏垣紅廟子藩籬乃可成搗穴犂巢之舉也濟木薩卽愷安城距古城九十里由此而西七十里爲三台驛又西八十里爲滋泥泉又西九十里爲阜康縣城又七十里爲黑溝驛又數十里至古牧地再進卽可抵烏魯木齊矣濟木薩距城尙遠不能扼賊之吭劉錦棠會師進勦必先據要地爲儲糧屯師之所然後左右伸縮可以有爲阜康雖祇空城而地當賊衝從前馬賊之犯科布多聞卽由阜康駛出劉錦棠之注意於此一爲進攻古收地一爲遏賊奔竄實非無見惟阜康駐軍僅能遮截逆賊出竄一路其西北瑪納斯出竄之路尤宜先事綢繆

臣密飭劉錦棠於未進阜康之先與金順圖之現按劉錦棠稟閏

五月初十日由巴里坤率所部數營進古城先赴濟木薩與金順

會商一切卽馳赴三台滋泥泉阜康一帶相度布置計旬日內外所部各軍可齊抵古城當調其分起銜接而進約立秋之前乃有戰事也劉錦棠所部分紮木壘河迤東護運各營擬調赴古城遺防各壘亟宜填紮臣已調記名提督徐占彪率所部五營前往徐占彪自請併歸劉錦棠就近調遣臣已允之計此時已抵巴里坤接替延紮其木壘河迤西一百三十餘里奇台古城諸處則已咨商金順飭原防各營分段縮紮當可無虞其哈密布置原有廣東提督張曜所部十三營及宋慶留哈勇丁八百名前以安西州有通巴古路徑張曜分營設防安西茲大軍前進巴古之間有徐占彪一軍填紮以時局言宜厚哈密通吐魯番大路之防而巴古通安玉之小路若在所緩而臣之駐肅僅親兵一營馬騎二百騎亦無可再撥者劉典與臣書慮肅軍之單不資分布而腹地漢回安謐分防各營尙有堪以應調者飭總兵徐萬福率所部兩營兩旅赴肅臣念督標兵丁久經訓練亦欲調其入營學戰以成其才除

調隨營馬步弁兵三百員名赴肅此月內外均可取齊擬俟到肅復酌增安玉防營俾張曜所部悉赴哈密以絕旁竄而備將來軍鋒之選此籌策布置大略也察看關內外征防諸軍和戢一心氣勢完固前敵軍糧長運短運均尙應手儲峙亦裕尙堪仰慰宸懷謹據實馳陳伏乞

聖鑒訓示

光緒二年六月初三日

覆陳杜賊紛竄摺

竊臣前奉

諭旨據額勒和布托倫布先後奏報逆匪竄擾沙札蓋等處見在大軍出關該逆鋌而走險窺伺北路自在意中烏科等城境內未
有重兵空虛可慮倘被其竄擾則勢成燎原聚殲不易著該大臣
等揀派勁旅於北路地方擇要扼紮以杜紛竄欽此閏五月十一
日欽奉

寄諭金順奏追剿北路竄匪情形並請飭烏科等城派兵扼紮要

隘英廉奏回匪竄擾塔境派隊防剿暨俄人解運軍糧被匪搶擄各摺片覽奏均悉賊匪由布倫托海竄出紅柳峽地方經官軍跟蹤追勦賊由吐魯番仍回烏魯木齊金順見派兵駐紮木壘河三箇泉等處梭巡防勦但北路沙磧遼濶無險可扼防不勝防且東路爲大軍後路糧運所必經該逆雖已歸巢難保不乘間窺伺金順仍當嚴飭派出各軍認真防探遇賊卽擊毋稍疏懈布倫托海迤西疊崙山地方竟有賊匪搶劫俄人糧石之事該處地勢以烏魯木湖烏梁海沙扎蓋爲扼要之區金順擬將塔爾巴哈臺索倫等隊扼紮烏魯木湖科布多蒙古等隊扼紮布倫托海或烏梁海適中之地烏里雅蘇臺黑龍江等隊扼紮沙扎蓋藉堵賊匪紛竄著榮全額勒和布車林多爾濟杜嘎爾托布倫保英英廉酌度情形倘能分撥官兵前往扼紮未始非先事預防之計惟各城兵勇無多防勦均屬喫緊恐一時不敷分撥兼顧爲難前月左宗棠奏資遣馬步出關當因烏科等城兵力甚單恐逆匪被勦旁竄諭令

該大臣等揀派勁旅於北路地方擇要扼紮見在烏魯木湖等處
既爲賊匪必竄之路卽著左宗棠金順妥爲籌商若各城無可分
撥之兵該大臣仍當懷遵前旨卽派勁兵前往駐紮以杜紛竄等
因欽此臣維制賊之要在審賊勢察賊情而合地形之遠近衝僻
以通籌乃可策全功而免意外之變臣於關外西北地形未能懸
揣不敢冒昧指陳上瀆

天聽惟前奉

諭旨揀派勁旅於北路地方擇要扼紮比已恭錄行知金順劉錦
棠熟察地形妥爲布置務期周密仰慰

宸厪一面咨委烏魯木齊領隊大臣錫綸赴沙山一帶預籌截勦
飭總兵桂錫楨都司馮以和所部併歸統帶茲金順派撥吉林黑
龍江馬隊合成十騎歸錫綸統帶以資得力並飭劉錦棠挑派將
領率步隊左之見准金順咨稱調徐學功馬隊三營步隊一營歸
錫綸調遣劉錦棠進阜康大隊取齊又適奉行知閏五月十一日

欽奉

諭旨自必恪遵派撥是錫綸兵力不虞單薄也錫綸生長邊陲熟悉蒙部情形能通蒙文蒙語聞其爲人亦甚倜儻與金順榮全均稱相得近時俄糧續由沙山一帶運送一百餘萬觔卽係錫綸迎護茲令防勦竄匪更有攸宜竊維用兵宜布遠勢金順所陳請將塔爾巴哈臺索倫等隊扼烏魯木湖蒙古科布多等隊扼布倫托海或烏梁海適中之地烏里雅蘇臺黑龍江等隊扼沙扎蓋原因賊騎颺忽特甚北路平沙廣漠防不勝防慮難一處聚旂故爲此節節邀截之計雖於烏科兵力單薄調隊維艱情形未遑計及而就事論事實有不容已者臣以賊情賊勢度之逆甘逆回被白彥虎迫脅出關者非盡屬其死黨不過因頻年未經重創相與安之白逆等復劫其各棄眷屬北竄遐荒似非陝甘各回所願至關外土回自戡定後訓服有年已成積弱之勢狡悍肆亂者無多白逆縱糾其北竄亦必無應之者如大軍進逼環攻諭以勦撫兼施之

意釋脅從而急渠魁解散必衆逆賊如從阜康境內竄出金順劉錦棠所部截之自有餘力如從瑪納斯竄出近則孔才各營稍遠則錫綸新統各營截之亦可不令其善脫而塔爾巴哈台後路又阻其前英廉所部雖單榮全應挑撥勁旅歸其調遣或扼之烏魯木湖或就近擇要截擊皆可確操勝算惟備禦不虞古之善教烏科等城舊爲邊城要地自古用兵西北從北路出兵無由南路者兵事未可久荒當此殘逆喘息僅存而使百密一疏亦非全策如慮兩城兵力單薄糧運維艱則

諭調精兵於科城烏城前路擇要扼防或卽由兩城領兵大員就近添調防兵嚴扼奔衝以資周防而固封守給以薪水口分俾其壹意布置務保無虞計北路兵事當可尅期告蒞需增防兵爲數非多所耗無幾而大局益增穩慎矣伏懇

申諭榮全英廉額勒和布車林多爾濟杜嘎爾托倫布保英實力籌維共襄茲舉毋因惜小費而忽遠猷則誠時局之幸謹據實陳

覆伏乞

聖鑒訓示施行

光緒二年六月初三日

軍機大臣寄光緒二年六月十七日奉字

上諭左宗棠奏布置出關各軍並覆陳杜賊紛竄情形金順奏特參副都統吉爾洪額不遵節制各摺覽奏均悉劉錦棠所部見擬進紮阜康爲進攻古牧地之計其瑪納斯一帶爲賊匪出竄之路尤宜先事預防左宗棠已飭令該員前赴濟木薩與金順會商妥辦此外奇台古城及哈密等處亦經分派隊伍扼要進紮並咨委錫綸帶隊赴沙山一帶截勦布置尙屬周妥劉錦棠率所部此時已行抵古城左宗棠金順妥速會商飭令各軍相機進取次第收復各城以期早日歲事惟大軍進勦該匪鋌而走險勢必四路分竄塔爾巴哈臺烏里雅蘇臺科布多等城兵力雖屬單薄亦應聯絡聲勢妥籌防勦著榮全額勒和布車林多爾濟杜嘎爾托倫布保英桂祥英廉各就見有兵力扼紮要隘遇有賊縱竄近卽行實

力兜勦毋稍疏虞副都統吉爾洪額因病請假該員所帶之隊經金順派令沙克都林北布前往接統乃吉爾洪額抗不交代輒將沙克都林北布禁錮室中並有令衆兵向沙克都林北布索取欠餉等情似此任性妄爲不遵軍律實堪痛恨著左宗棠按照金順原奏各節認真查辦據實具奏其所統官兵卽著金順飭令迅速交出不准藉詞宕延一面先將該副都統看管聽候查辦金順原摺著鈔給左宗棠閱看將此由六百里各諭令知之欽此

官軍攻拔古牧地堅巢克復烏魯木齊迪化州大概情形摺

竊出塞諸軍次第進至古城留駐巴里坤並籌防各要隘情形

已於六月初三日詳細陳明嗣據總理行營營務三品卿銜布政

使銜西甯道劉錦棠稟報六月初一日率所部馬步各營進抵濟

木薩與金順商定機宜同時西進沿途各要隘均派營守之初八

日金順進駐阜康縣城劉錦棠進紮城東之九營銜調知逆首白

彥虎已由紅廟子移踞古牧地糾合該處回酋併力迎敵安集延

亦遣賊目率黨助戰劉錦棠以賊中正穫麥豆有糧可因雖後隊
尙未到齊然師期不宜再緩察看阜康大路至黑溝驛七十里縣
西一帶深林蔽日野潦縱橫二十里爲西樹兒頭子尙有廢渠堪
引縣西之水以供汲飲由此五十里抵黑溝驛則盡戈壁無水泉
中間惟甘泉堡一督井開濬僅供百人一日之需不能安營詢之
土人知黑溝驛之上爲黃田水盈溝澮上流卽古牧地賊已於起
築卡樹柵嚴密守護意在斷官軍汲道迫官軍由大道越戈壁五
十里而來前阻堅城人馬渴乏可乘其敝也十九日劉錦棠調集
馬步各營拔至阜康縣城西十里督飭勇丁開溝引水節節流通
引至二十里之西樹兒頭子就地築壘二十日派馬步各隊排列
甘泉堡故掘督井示行大路以懈賊黃田之防騎賊來窺旋即退
去二十一夜三更劉錦棠潛師夜起會金順所部進襲黃田黎明
行進黃田卡柵賊始驚覺騎賊紛出遙聞古牧地附近角聲四起
劉錦棠與金順率所部先踞山崗金順飭所部由右路進劉錦棠

飭陝西鎮總兵余虎恩總兵陶鼎金率馬隊進左路之左甯夏鎮
總兵譚拔萃參將董福祥副將張俊率步隊繼之提督黃萬鵬率
旌善馬隊進左路之右漢中鎮總兵譚上連提督蕭元亨戴宏勝
譚慎典湯秀齋率步隊繼之提督譚和義唐國華率步隊擁護開
花大礮知府羅長祐直隸州知州袁堯齡提督張春發副將湯仁
和率步隊保護輜重分布已定余虎恩黃萬鵬等先率馬隊分馳
下山賊騎向前迎敵官軍奮威猛擊賊且戰且走旋復合步賊來
拒余虎恩等督馬隊張兩翼譚拔萃譚上連董福祥等率步隊由
中路衝出鏖戰數合陣斃悍賊甚多余虎恩黃萬鵬等左右包抄
而前賊遂大潰卡柵踞逆見官軍銳不可當棄輜重狂竄劉錦棠
飭馬步各隊躡踪緊追且追且殺徑抵古牧地踞賊有縮入城者
有南向紅廟子奔竄者其右路之賊亦經金順擊敗劉錦棠見古
牧地城大而堅未可猝拔收隊還駐黃田計是役斃賊極多生擒
二十一名奪獲旂幟鎗械數十件戰馬二十八匹劉錦棠所部陣

亡弁勇十四員名受傷弁勇三十八員名此二十二日會師攻拔黃田堅卡追賊至古牧地獲勝之實在情形也據擒賊供踞黃田卡柵者陝逆白彥虎之黨踞古牧城之回酋馬明因白逆安集延曾疑其與官軍通押回南路喉頭目王治金中萬率土回堅守其與官軍接仗之黃衣騎賊則安集延及南路各纏回也二十三日劉錦棠派營分紮古牧地城正東及東北二十四日卯刻劉錦棠見有騎賊數千由紅廟而來一面告知金順準備一面飭余虎恩黃萬鵬等率馬隊馳赴山前嚴陣以待飭步營爲策應又調步隊分兩路攻南關分兩路攻山壘一面昇開花大礮安城東南礮臺轟其山壘復移轟城關牆垛多圯劉錦棠卽令譚上連袁堯齡等分途進攻以親兵徑搗山壘之前以馬隊繞出後面斷賊入城之路各將弁勇丁鼓勇齊登遂奪其壘譚上連等見山壘已得士氣愈奮皆冒鎗礮斬關而入立將城關攻破賊奔城中斬擒甚衆劉錦棠卽派各營進據關壘援賊悉力衝撲數次均經馬隊攔截金

順並派馬隊兜剿鏖戰逾時殪斃黃衣賊酋羣賊氣奪敗潰而南
馬軍兩隊合追至卡子溝收隊是役除金順一軍殺賊不計外劉
錦棠所部殺斃轟斃悍賊約五六百名生擒安集延逆賊二名南
路和闐阿克蘇纏回各三名葉爾羌纏回四名土回無數奪健馬
三十五匹洋鎗膏油鎗旗幟刀矛無算陣亡弁勇二十九員名受
傷弁勇一百五十七員名此二十四日官軍進攻古牧地奪壘奪
關並擊敗援賊大獲勝仗之實在情形也據擒賊供安集延曾調
集南路各城馬隊派頭目阿托愛管帶來此助戰官軍馬隊獲黑
馬一匹裝飾珍異卽阿逆坐馬惟阿逆下落尙不可知二十七日
劉錦棠以古牧地關壘旣克輯懷城鎖圍已合各營攻具已備飭
發開花礮轟倒東北兩面城各一二丈面商金順並飭所部各營
分路急攻二十八日寅刻復轟塌城東南牆垛劉錦棠督弁丁三
面猛攻城賊拚拒鏖戰兩時劉錦棠所部中軍及董字營突由東
南角一擁而入金順所部與劉錦棠所部之派攻東北各營者亦

踴躍齊登將城中悍賊五六千人一併斫殺淨盡有逸出者亦經預派各馬隊截殺無一漏網拔出難民婦女幼孩甚衆劉錦棠以古牧地既克守賊盡殲烏垣逆賊必聞風膽落乘勝直搗一鼓可下遂一面知會金順一面派隊於二十九日黎明親督向烏垣進發經過卡壘一律踏平迨抵城東見賊紛竄麾軍分途猛撲斬截無數立將烏魯木齊迪化州城池及僞建王城同時克復馬隊躡賊緊追至鹽池墩一帶始還探報昌吉縣踞逆業已宵遁其瑪納斯呼圖壁各城已否克復雖未得確耗然亦斷難穩踞此攻拔古牧地克復烏魯木齊迪化州城池大概情形也臣維烏魯木齊各城爲新疆關鍵屬中原多故客回構變土回隨之安集延以亡國之餘乘機竊踞南路重煩

朝廷西顧之憂蓋有年矣茲由關內籌餉集糧選將出師踰越重險會師進討甫歷四月連下堅城非苟

天恩軫恤征軍

特頒內帑各疆臣時艱同值仰體

皇仁推食解衣俾得踴躍前驅迅赴事機之會何以臻此惟餘孽猶存安集延狂寇兇燄雖熾尙未大加懲創是則區區微衷所難自釋者也所有官軍會師進勦攻拔古牧地堅巢克復烏魯木齊迪化州各城池情形先陳大概仰慰

聖懷其戰狀一切及賊踪聚散分合辦理善後獎卹員弁各事宜俟金順咨報劉錦棠續稟到營再會同金順馳奏合併聲明伏乞

聖鑒訓示施行

光緒二年七月十八日

光緒二十年八月初三日內閣奉

上諭左宗棠奏官軍會勦賊匪大獲勝仗攻拔堅巢克復烏魯木齊等城大概情形一摺左宗棠督飭西甯道劉錦棠率各營會同烏魯木齊都統金順所部於本年六月間由濟木薩西進逆首白彥虎由紅廟子移踞古牧地糾合該處回酋併力迎敵安集延亦

遣頭目率黨助戰官軍會襲黃田賊卡分途進擊陣斃悍賊甚多
踞賊敗竄官軍緊蹙追殺直抵古牧地各將領鼓勇齊進遂奪其
壘立將南關攻破六月二十七日劉錦棠會商金順率所部急攻
開放大礮轟塌城堞二十八日各軍踴躍登城將城中悍賊五六
千人殲除淨盡二十九日乘勝進勦烏魯木齊踞逆經過卡壘一
律踏平該逆紛紛竄遁斬馘無數立將烏魯木齊迪化州城池克
復勦辦甚爲得手左宗棠規畫調度洞中機宜金順劉錦棠勦賊
奮勇均堪嘉尚所有一切詳細情形及應行獎卹各員卽著該大
臣等查明具奏仍著督飭各軍實力勦辦並查明逆首白彥虎等
下落毋任漏網以靖邊疆欽此

官軍攻拔古牧地克復烏魯木齊迪化州戰狀摺

竊官軍會師進剿攻拔黃田賊柵古牧地堅巢克復烏魯木齊迪
化州各城大概情形臣已於七月十八日專摺馳陳茲據總理行
營營務三品卿銜布政使銜西甯道法福浚阿巴圖魯劉錦棠續

報六月二十四日攻拔古牧地關壘並擊敗援賊大捷之後金順
劉錦棠策馬巡視知古牧地城賊守備甚嚴金順遂飭所部環城
正西西北西南三面結壘劉錦棠環城之正北東北正東東南正
南等面結壘抽派營勇於南城外晝夜修築礮台以高過城身一
丈爲度其各面原有礮台均令培土鋪板以便安礮迨礮台告成
布置就緒金順督所部攻西北一帶並分開花銅礮一尊置湘軍
礮台二十六日劉錦棠飭甯夏鎮總兵譚拔萃率千總莊偉以開
花大礮轟塌東北面城堦復用開花銅礮並劈山礮緊對缺口連
轟之二十七日移開花大礮斜轟城之正東其轟塌缺口與東北
相似復以開花小礮及劈山礮環攻不歇城內賊衆踞守益堅二
鼓後劉錦棠傳集將領商定策畧飭譚拔萃督同提督席大成副
將湯仁和率左軍三營由東北缺口進攻漢中鎮總兵譚上連督
同提督蕭元亨戴宏勝率右軍三營由正東缺口進攻均各留隊
以遏賊竄知府羅長祐督同副將楊金龍及莊偉率親兵移開花

大礮於正南礮台伺天色嚮明指轟南門左側並調集標針快響鎗七響洋鎗劈山礮排列礮台左右同時轟擊提督譚慎典譚和義率中軍左四旗參將董福祥副將張俊率董宇兩營各飭勇丁囊土潛伏墻壕俟大礮轟有缺口卽行攻入直隸州知州袁堯齡提督唐國華湯秀齋率中軍右三旗列隊南城左右以備策應並遏賊出竄之路陝安鎮總兵余虎恩督同總兵陶鼎金率馬隊兩營提督黃萬鵬督同千總崔偉畢大才禹中海守備禹益長馬正國率馬隊五旗提督陶生林率馬隊一營分布正南一帶山岡提督張春發陳廣發率步隊兩營分布西南一帶平川俟賊出竄截擊布置已定劉錦棠自率老馬隊於城南山壘憑高督陣二十八日黎明開花大礮轟動南城左側子墻漸圯大礮測準連轟城身圯缺過半城頭悍賊潛伏城隈俾施鎗礮官軍標針快響鎗七響鎗劈山礮連發子注如雨賊多死者城南壘中號鼓齊發南路攻城隊伍飛奔齊進城猶以鎗礮憑墻抵放官軍旣上缺口各以

火包向賊紛擲後隊復囊土填壕一擁而入將施放鎗礮拒賊悉
數斬殺城中悍賊分扼巷口死拒譚慎典譚和義張俊董福祥等
各督隊短兵相接斬馘甚衆時譚拔萃均已入城金順所部又由
東北面併進合擊巷戰之賊斫殺殆盡其由缺口逸出者均經預
派各馬步截殺無一漏網陝回頭目馬十娃爲禹中海素識擒而
斬之其餘所斬賊目則不知誰何也劉錦棠見城賊也淨始飭所
部收隊還營計是役擊斃殺斃焚斃悍賊不止五六千人生擒二
百十五人拔出難民婦女幼孩甚衆奪獲賊馬二百餘匹鎗礮旂
幟刀矛無數劉錦棠所部陣亡員弁勇丁一百五十八員名受傷
四百五十五員名據擒賊供回曾王智卽王治及金中萬均經官
兵殲斃其安集延派援兩賊目一縐塞奇一玉只把什共帶夷兵
三百五十八人已於二十四日盡殲其城內夷兵除生擒外亦均
於是日盡矣白逆彥虎本踞紅廟子時往來卡子溝未曾入城故
得倖免此二十八日會師攻拔古牧地堅巢首要各逆擒斬淨盡

之實在情形也劉錦棠入城察看尙存火藥硝磺數千觔拾回漢文各一通閱係王治金中萬等被困求救於烏城逆首阿奇木者其批回言烏城精壯已悉數遣來現在三城防守乏人南疆之兵不能速至爾等可守則守否則退回烏城併力固守亦可阿奇木係怕夏派甘回馬人得所充之官管轄古牧地烏垣紅廟瑪納斯及僞王城回兵者所稱三城蓋指烏魯木齊迪化州及已死僞清真王安得璘所築之王城所稱南疆則指安業延而言也劉錦棠以烏垣空虛當乘勝急攻遂一面知會金順一面派弁偵探旋據報稱卡子溝兩賊壘已空距卡子溝二十里之七道灣有賊竄走劉錦棠卽飭譚和義唐國華兩營留守古牧地城餘隊均於二十九日黎明親督進烏垣金順亦督所部繼進行近七道灣堡馬隊回報堡外尙有餘賊見官軍至飛騎而竄馬隊躡追斃賊十餘名劉錦棠卽留董福祥步隊一營守堡餘隊悉拔前進行近烏城十里地方探報三城騎賊紛竄遂催馬步急進甫抵迪化州城北見

竄賊千餘已出城里許向南奔逸劉錦棠立飭余虎恩陶生林陶鼎金率馬隊三營由左路追擊譚拔萃席大成張春發湯仁和率步隊四營繼之黃萬鵬崔偉畢大才禹益長馬正國禹中海率馬隊五旗由右路追擊譚上連蕭元亨戴宏勝陳光發率步隊四營繼之譚慎典湯秀齋張俊率步隊三營由北城衝入劉錦棠率羅長祐袁堯齡及老馬隊親兵列隊城北旋據入城各營飛報城中悍賊百餘人悉經斬殺生擒賊十三名此外未持械者悉釋勿誅劉錦棠復分隊入僞王城及烏魯木齊合金順所部將未竄零賊盡殺無遺據擒賊供二十四日古牧地關壘克復援賊敗退賊首馬人得與白彥虎等聚議以官軍銳不可當莫如先遣婦女輜重南竄留精壯駐守再候消息嗣見官軍大至遂相率逃奔訊畢斬之適追賊馬步各營收隊入城據稱分追至十餘里地方賊回頭拚拒馬隊合力猛擊斬殺甚多陶鼎金腮受矛傷裹創與余虎恩黃萬鵬等急麾馬隊追殺至城南三十里之鹽池墩因踰此而南

卽係戈壁未便深追時譚拔萃譚上連率步隊繼至遂與收隊而
還是役斃賊約五六百名生擒二十六名劉錦棠所部陣亡員弁
勇丁一百三十員名受傷四十七員名奪獲戰馬七十餘匹拔出
城中難民老幼婦女及避匿山谷者均設法安撫派營務處委員
直隸州知州袁堯齡經理其事一面商由金順暫委該員代理迪
化州篆務以專責成烏城克復劉錦棠連派哨探擒獲零賊僉稱
昌吉呼圖壁瑪納斯等城踞逆先後向南竄逸安集延曾怕夏遣
來援賊四五千騎聞已至距烏城一百八十里之大阪地方劉錦
棠擬派隊迎擊旋訶知援賊已退遂止此二十九日會師連克烏
魯木齊迪化州等城追擊竄賊之詳細情形也現在新疆北路一
律肅清臣擬商金順錫綸布置各城堡要隘一面商辦善後事宜
一面咨調張曜徐占彪會同劉錦棠進規南路并增派馬步各營
及鎗隊礮隊赴前敵助剿一俟布署妥畢再行馳報竊維烏魯木
齊各城自同治三年逆回妥明卽妥得璘肇亂戕都統提督竊踞

其中逾二年自稱爲清真王逆黨馬泰馬仲馬明馬官各署僞號分踞古牧地吐魯番瑪納斯等城又六年安明嗾黨與安集延戰於庫車爲安集延所敗安集延旋赴吐魯番糾安明之黨馬仲併攻安明安明乞降仍令爲清真王踞守烏城別以馬仲爲阿奇木總管各事嗣徐學功帶隊進勦陣斬馬仲其子襲阿奇木僞職與安明積不相能復糾安集延曾攻安明安明旣斃馬明馬官等悉降自是安集延遂於此征收地稅令回漢雜髮易服效其舊俗皆光頂圓領以自別而烏垣各城遂淪爲異域矣安集延曾怕夏兩次與逆回博鬪降安明等盡掠其遺資搜括漢回民人金帛轉輸南路實其窟穴而驅其丁壯踞守烏垣各城以爲屏蔽迨陝逆白彥虎糾陝甘悍回竄至自知勢力不敵安集延思藉爲聲援以自固凡怕夏所欲不敢違也故怕夏日富而土回日益貧比聞大軍由巴里坤古城浩蕩而來白逆亦雜髮易服竊附於安集延其結死黨與土回堅拒官軍自觀成敗伺閒脫走則又此賊之慣技也

此次兵由北路而進一在扼其紛竄以省防兵一在下兵南路防其牽綴而由關內出兵踰伊吾車師之地越天山蒲類重險與犬羊相角逐不自忖兵力餉力之足與不足置成敗利鈍於不顧者蓋不得烏魯木齊無駐軍之所賊如紛竄無以制之不僅陝甘之憂卽燕晉內外蒙古將無息肩之日若停兵巴古以東瘠區兵少無以扼奔衝兵多徒以耗軍餉無論非時局所堪卽四海宴安軍儲贍裕亦斷難爲持久之計茲幸

聖模廣運

宸慮獨操樞垣計諸部臣仰體

淵衷詳爲籌措俾行間將士得以壹意前驅旬日之間連下堅城肅伸

天討固非微臣始念所及也在事尤爲出力文武各員著有微勞合無仰懇

天恩先加甄叙以昭激勸伏乞

聖鑒訓示

光緒二年八月初一日

諭旨

天啓國非... 朕念爾又由五事... 朕出仗文苑各員... 著交...

諭旨

朕念爾... 朕出仗文苑各員... 著交...

諭旨

諭旨

諭旨

朕念爾... 朕出仗文苑各員... 著交...

朕念爾... 朕出仗文苑各員... 著交...

朕念爾... 朕出仗文苑各員... 著交...

朕念爾... 朕出仗文苑各員... 著交...

朕念爾... 朕出仗文苑各員... 著交...

朕念爾... 朕出仗文苑各員... 著交...